

光緒江西通志

江西通志卷一百二十八

宣績錄三

統轄

國朝

遲變龍漢軍正白旗人爲江西左布政使時封疆初定
變龍招集流離加意撫輯歸業者無虛日順治五年金
聲桓王得仁據城叛變龍以大義叱之遂遇害闔門殉
者數十人

謝志

金震出字鳴遠湖廣江陵人順治三年分守嶺北道時
大兵甫定贛州居民十無一二震出至力請撫綏禁
兵士橫誅財物婦女係累者勸釋之歸城內外積骸盈
路捐資瘞埋不可數計虔人至今頌之

贛州府志

劉武元字柱國漢軍鑲紅旗人順治三年自天津兵備

道擢南贛巡撫時驍將多恣橫諸監司不能制武元申明令甲嚴輯部伍繩毒民者以法殘黎獲安四年遣副將劉伯祿徐啟仁等分剿瑞金石城興國龍南甯都上猶等縣擒斬僞都統葉南芝僞軍門劉志諭劉飛等剪平魚骨蓮花丁田鉤刀嘴諸賊寨五年正月江西總兵金聲桓副將王得仁據南昌叛糾黨犯贛州武元與總兵胡有陞協力守禦閏三月糧盡鼓勵士卒奮戰得仁中創遁時大兵已復九江聲桓聞之謀退保南昌武元出奇兵襲其後敗之大湖港斬獲無算李成棟自廣東擁眾數萬將薄城下武元授計諸將分兵出東西南三門大破賊成棟以數騎走事

聞得

旨嘉獎加右都御史銜兼兵部侍郎

賜紫貂冠服甲冑佩刀鞍馬六年征南大將軍譚泰旣克南昌遣副都統覺善等會武元勦成棟克信豐成棟宵遁墮河死武元分遣部將勦成棟餘黨於瑞金雩都崇義等縣及甯都土賊彭順慶大庾流氓羅榮皆破平之敘功加太子太保兵部尙書晉世職爲一等輕車都尉加一雲騎尉十年以疾乞罷者再

諭獎其撫贛多年勞績茂著

命還京調治十一年卒贈少保廕一子入監

賜祭葬如例謚明靖

本傳
州府志

贛

張鳳儀字瑞梧奉天錦州諸生順治初知廣信府事兵燹之後實心撫循大兵入閩道廣信鳳儀籌畫供應

不以煩民四年摧分巡嶺北道尤以輯悍卒恤殘黎爲事招徠流亡俾之復業五年金聲桓王得仁叛舉兵圍贛鳳儀與巡撫劉武元總兵胡有陞竭力守禦賊圍城數月不解糧匱乏石米四十金諸將或言老弱糜軍食者眾不若盡戮之誓死固守鳳儀曰諸君欲反邪王者之師攻城猶不可盡敵況守城而盡戮我民乎巡撫是

其說未幾援至一郡獲全

一統志
贛州府志

胡有陞漢軍鑲黃旗人順治四年授南贛總兵五年金聲桓王得仁叛固贛州有陞偕巡撫劉武元巡道張鳳儀固守率健卒沿城策應賊穴城將置火具仰攻有陞以石塞所穴竄賊計遂沮閱三月城中糧匱士卒饑疲有陞拊循之人無叛志已而大軍攻南昌聲桓引眾

北走追擊於大湖港殲其大半尋破廣東叛鎮李成棟
一郡獲全先是南贛總兵柯永盛遷湖廣總督請以南
贛鎮兵二千自隨部議如所請有陞疏言贛地當江湖
關鍵好武輕生奸宄易作且廣東賊寇尙多金逆未平
正資勦禦鎮兵習水土知地理攻守所宜移去非便奏
入

詔仍留鎮兵而令永盛別募至是聲桓成棟等相繼翦滅大
軍凱還上猶龍南石城零都瑞金諸土賊猶負固抗拒
卒倚鎮兵分剿先後蕩平敘功加左都督三遇

恩詔自二等男晉爵至三等子十年復獎前功

特詔加太子少保十七年致仕康熙三年復

詔予騎都尉世職合所得世爵爲一等子八年九月卒子啟泰

龍岡後改隸鑲白旗

八旗通志
贛州府志

莊應會字素鶴江南武進人

進士題名碑作
武進籍金壇人

明崇禎元

年進士順治初歷官江西右布政使入

覲奏言瑞袁二府地隘土瘠自明洪武以來賦斂倍他郡洊經

兵燹戶少額多積逋日甚請逾格軫恤得

旨下巡撫確勘旋蠲免二府浮糧一十三萬六千有奇江西人

至今思其德內升刑部侍郎

舊志

夏一鶚漢軍正白旗人

謝志作蕭
洲人誤

貢士順治八年巡撫

江西時境內多未靖九仙山賊陳九思宜黃賊曾明等

負固出沒警報日至一鶚分地設防授諸縣方略勦撫

羣賊悉平境內多荒田吏緣爲利一鶚劾貪壘二十餘

人計墾地多寡以清糧稅招流亡給產業民得所歸

謝志

蔡士英字伯彥一字魁吾漢軍正白旗人順治九年四月授江西巡撫時廣西土賊楊文等集浙閩流亡踞九仙山肆掠旁邑袁州吉安土賊劉京李文斌受明桂王朱山榔圖糾眾陷安福永新諸縣士英至與提督劉光弼會商援勦遣遊擊岑應元等擊敗賊眾復安福永新京文斌先後擒斬遂會浙師攻破九仙山賊寨楊文中礮死降其弟楊富等餘眾竝受撫僞總兵霍武結閩寇滋擾江西僞都督曹志攀僞總兵汪文生先後犯饒州廣信士英檄兵進剿復遣湖東道安煥通判張羽明等諭降之先是江西巡撫夏一鶚請豁荒田稅糧部議令士英覆核至是奏陳通省荒田確數十萬七千五百餘頃較前撫臣所報多二萬五千六十七畝有奇乞

恩准豁除國計民生兩有攸賴又覆勘右布政使莊應會奏減
袁州瑞州二府浮糧請從原額每畝九升三合起科以
蘇民困均得

旨允行擢漕運總督致仕歸卒

賜祭葬如例諡襄敏著有撫江集督漕奏議

八旗通志
安徽志

佟國器字匯白漢軍正藍旗人貢士順治十二年自福
建巡撫調撫南贛兵燹之後田多汙萊前撫臣請將十
三年額賦一律科徵民情惶懼國器奏請以未墾之田
交屯道屯廳開墾民心遂定山賊曾拱辰據興國之梅
窖坑受孫可望僞檄剽掠吉贛二郡黃鄉賊楊興受撫
復叛皆遣將討平之粵之惠潮閩之甯化等處土寇出
沒次第翦除所部及鄰境羣盜略盡故事贛漕運南昌

贛兵食米又自南昌運給灘石峻險轉輸者苦之國器疏請留贛漕以給兵省毋饋糧抵漕之數兵民皆稱便時重兵宿贛久議興屯佐食國器曰政貴因地行屯於贛無益事遂寢調撫浙江以勞疾卒著有撫虔奏疏

八旗

通志 熊文舉碑記

郎廷佐字一桂漢軍鑲黃旗人由官學生授內院筆帖式累遷祕書院學士順治十一年授江西巡撫江西自明末洊遭兵亂水旱頻仍逋賦甚多廷佐再疏請蠲緩以蘇民困得

旨俞允時土賊洪國柱繆我章等剽掠饒州廣信閒廷佐遣將往剿降之十三年擢江南江西總督十八年改江南總督康熙四年仍兼督江西七年以疾解任十三年起補

福建總督卒於官

八旗通志

許世昌字仲軒漢軍正紅旗人巡按江西廉平仁恕以興利除弊爲己任釐剔軍屯平反冤獄至於學校祠宇罔不修舉吏畏民懷頌聲洋溢西江百姓至今猶祠祀之

舊志

蘇宏祖字光啟一字耀我漢軍正紅旗人由舉人爲啟心郎順治十五年以左僉都御史巡撫南贛廣寇李玉廷劫掠寧都再降再叛至是凡三亂宏祖授諸將方略擒戮之又平五指石及廣昌諸賊敘功加一級時地方初定學宮傾圮宏祖首倡捐修規制鉅麗又建啓聖祠及王文成祠手輯經世名言爲目十二康熙元年致仕

八旗通志
贛州府志

陳安國陝西沔縣人諸生順治閒爲九江分守道屬邑多荒賦民不能供安國力請減免以數萬計百姓德之

湖廣通志

詳案謝志秩官安國列祀道與此不同未審何以致誤

王庭字言遠一字邁人浙江嘉興人順治六年進士授廣州知府從平粵東擢廣西副使提學四川累遷江西右布政使順治十七年充江西武鄉試主考官得人稱盛江西諸郡久困浮糧巡撫奏蠲瑞袁二府未及南昌康熙元年庭入

覲面陳其事部議允行已而事竟中阻士民終德之爲建生祠

祀焉庭留心民事屬吏進謁者輒諄諄以收養百姓爲

勸改官山西以裁缺乞歸卒年八十有七

舊志興府志

湯斌字孔伯一字荆峴河南睢州人順治九年進士選

庶吉士授檢討出爲潼關道副使十六年升嶺北道參政甫三月清積獄八百有奇李玉廷者明舊將也有眾萬人據雩都山寨詐約降會鄭成功犯江甯遣謀來贛斌獲謀斬之策玉廷且中變自巡撫蘇宏祖亟移兵守南安玉廷果至見有備卻走遣兵扼其歸路卒就擒嶺嶠以靖平南軍過南安殺人有司以鬪殺論斌曰力倖者謂之鬪今軍無寸傷而民以兵死與律不應卒抵軍於法尋乞病歸再起卒官工部尙書乾隆元年

賜諡文正道光三年

詔從祀孔子廟廷

黃宗義所撰神道碑
所撰墓志銘

贛州府志 江苑

施閏章字尙白一字岷雲江南宣城人順治六年進士補刑部主事累遷分守湖西參議轄吉瑞袁三州袁無

土著流民集其壯者萬人聚文昌折桂二鄉吉水令捕其梟長髮廣袖檻車詣軍門閨章陳兵叱縛其人髡其首髮割所衣廣袖而盡釋之約令悔罪招致其部下皆予以不死且自爲文使持告兩鄉民其人流涕願如約時軍饑嚴迫屬邑多逋賦追呼急輒相聚爲盜閨章作勸民急公歌垂涕泣諭之民相率輸租恐後嘗厯山谷閒悉窮民狀作彈子嶺大阮歎竹源坑諸篇以獻上官上官咨嗟比之元結謂不減春陵行也暇日修景賢齋洲兩書院行部所至輒與諸生講學學徒從之甚眾缺裁父老留之不得醺金建龍岡書院祠閨章留講學三日而後去初湖西道駐臨江有清江環城下民過之咸泣曰是江如使君因呼爲使君江至是送至江上咸恨

恒不能別復送至湖值湖漲所乘舟輕不可渡民率買石膏填之既渡乏食賣船而歸里居十年復以博學鴻

詞徵考授侍講轉侍讀卒

錢林文獻徵存錄

王繼文字在茲漢軍鑲黃旗人

謝志滿洲人誤

官學生由戶部

郎中出爲饒南九道甫下車值清蘆使者至時洲民新羅水患懼供億無所出則皆竄或往往雉經以死繼文亟下令撫慰人恃以安又從使者行烈日中周巡履勘凡童灘所在必委曲以免之外泯異同中施補救迄終事而不擾民潯陽人至今感之累官至雲貴總督

本傳九

江府志

崔掄奇字正誼河南夏邑人順治四年進士十八年以兵部郎中榷關九江性廉恕關稅偶缺則稱貸以益之

不以招克累商也值郡火災掄奇出己金助賑戶米一石錢稱是好文學新濂溪書院日課士拔其尤者又復煙水亭構樓以祀古賢自爲之記

安志 江府志 九

李士正山東昌邑人貢士康熙三年官分守湖東道藩商踞建昌強貸民錢歲息不入則擒而折辱之民傾產鬻妻子弗給往往自盡士正行部至南城諸生趙由忭率府縣兩學生叩馬訴之士正覽牒泣下力請於大吏驅商出境郡人深感其德及官巡撫清操彌厲多所興革尤愼於刑獄民以不冤

舊志 謹案八旗通志列傳士正漢軍正白旗人

劉捷字公愚一字玉壘順天大城人順治三年進士康熙九年任江西布政使十一年大饑南康九江二府特甚樞親往振之收兌錢糧吏必以羨進曰此成規也樞

曰官自私耳何成規之有屏不納明年入

觀疏請蠲南昌府浮額糧下部未及覆旋出都道擢太常寺卿
聞江西寇警疾馳還任至則人情方洶懼見樾咸迎馬
首呼曰劉公來吾屬無憂矣故事藩伯旣遷卽行不俟
新任之至時攝篆者爲糧道姚啓盛力任艱鉅趣樾行
樾持不可卽日授印視事庀餼籌兵多方固圉江城賴
以安定累官至刑部尙書卒諡端敏

安志

姚啓盛字際斯遼東杏山人康熙九年以刑科給事中
分巡南贛持大體不事煩苛市井豪猾及胥吏貪墨者
必繩以法贛城數多火災啓盛教民造綆缶舂搗之具
以禦之城東小山曰火燄浚大井於遠覆之以閤命曰
天一取以水克火之義至是啓盛復增修之火患衰息

又於十八灘設艇拯溺革零都大當之派積困以蘇升

江西督糧道厯布政使卒於官

贛州府志 謹案姚啓盛漢軍鑲紅旗人順治

乙未進士見國子監題名

黃龍字臥庵漢軍正紅旗人廕生康熙十年由四川永甯副使擢江西按察使性慈祥才識明敏遇命盜重案必焚香告天然後出聽至誠推鞠不事嚴刑而真情亦無所遁尤惡屬吏濫刑立循環二冊令詳列夾訊狀月稽覈之嚴寒酷暑於應給囚糧外加給日食獄吏凌虐剋減之弊不敢行江西俗尚溺女龍大張例禁違者治以故殺子孫罪風俗一變養女者多以黃姑姓姑名之每朔望親至公所宣講

聖諭勸戒諄切聞者感動與同官和衷共濟接見寮屬必詳叩

地方利弊力爲興革吏民不率教者亦執法不少恕皆畏威而懷德焉十二年四月以事去官士民罷市籲督撫請留格不行乃立石署前且爲詩歌以送行名曰江

人淚

八旗通志 謹案黃龍久祀名宦其政績有過人者謝志滿未立傳今爲補纂

李光座字東園河南祥符人順治六年進士歷任江西按察使值滇湘變亂郡邑煽動上變者多株連爲奸利光座廉得其情擿三名者寘於理全活甚眾每手治爰書不假掾吏必求無憾乃已康熙七年以勞疾卒

志安

白色純字素公漢軍鑲黃旗人康熙十三年七月授江西巡撫時逆藩吳三桂耿精忠反賊黨分道窺伺江西掠良民率去其髮辮將吏遇無辮者輒誅之賊黨益固賊營城外兵至賊走見民以爲賊也多執其妻女民益

駭色純既之任疏請禁止下兵部議行民脫身歸者相
屬賊勢遂孤乃分遣諸將擊賊遊擊李天柱等敗耿精
忠僞將於會昌又敗之湖城擒僞副將楊權遊擊田振
敗賊西塘擒僞都司鍾喜泰等十四年二月復遣天柱
等擊吳三桂僞將陳昇於楊邨復龍泉縣遣同知碩岱
等宣諭興國瑞金雩都諸土賊降其魁四境略定其年
十一月卒於官

賜祭葬如例諡勤僖

本傳
舊志

佟國正漢軍鑲黃旗人由拔貢生授江南無爲州知州
累升按察使康熙十三年遷江西布政使時江西方用
兵會巡撫白色純卒大將軍安親王岳樂奏國正甚得
民心

特擢江西巡撫尋赴贛州駐守廣東從逆提督嚴自明等糾眾

偏南康國正遣副將許盛等敗之於庫鎮埔賊遁南安

逆黨黃士標王割耳等復犯信豐國正遣守備楊以松

等三路逆擊賊潰竄南雄尋復上猶龍泉會昌瑞金崇

義等縣前後招降以數萬計逆渠韓大任白甯都敗竄

萬安國正慮逸人楚境密調兵至夏口大王廟諸處邀

截之別遣將出興國之田邨大江口斷賊糧道賊窘甚

竄突復遣遊擊楊以松等四路追剿十二月擊賊於鷓

鴉寨十七年正月追至老虎洞大敗之大任走汀州詣

康親王傑書軍門降江西平國正回南昌敘功加兵部

右侍郎銜旋晉尙書授正一品階

本傳

哲爾肯漢軍鑲紅旗人由佐領授刑部員外郎康熙十

三年吳三桂倡亂哲爾肯以御史隨大軍出征江西十四年授都督僉事任南贛鎮總兵十五年加都督同知時耿精忠叛黨踞會昌雩都間與汀州僞將劉應麟興國屯弁朱明相犄角勢張甚哲爾肯以計獲賊幟令我兵執以進賊不疑襲擊大破之十六年韓大任據吉安白雲都分坑渡河攻鷓鴣老新二寨哲爾肯力戰斬五百餘級時閩楚粵諸寇蜂起饒道梗哲爾肯力復萬安泰和二縣江西糧運遂通敘功加左都督十八年擢

廣西提督

本傳
州府志
贛

郭景昌字瑞旭遼東瀋陽人貢士康熙三年授吉安知府時郡縣多盜軍戶以運漕累民民深爲患景昌減騎從親歷屬邑察民閒疾苦得首盜二十餘人悉肆諸市

乃約胥吏丈田畝清軍戶減漕艘復民食淮鹽之舊以紓積困十四年擢湖西道大軍進剿韓大任景昌理軍需民不擾而事給及賊棄城遁主帥以連歲不下積忿將屠之景昌力請得免復捐金贖男女之被掠者吉人至今德之

舊志
安府志
吉

邵吳遠字戒三一字呂璜浙江仁和人康熙三年進士選庶吉士改戶部主事升郎中十四年提學江右時值軍興士多流播轉徙吳遠謀所以招徠之乃捐設試院士至者隨其先後輒與試甲乙既定進諸生講析文藝擁坐肩相摩愉如家人父子雖盛寒暘竟日無倦容按部所至問巖穴之英常造廬往見建昌士人遭亂失其妻訴之吳遠卽傾囊以贖之兵戈旣久列郡學宮多

廢初按試皆居城外及再任十三郡學宮悉爲重葺云

謝志

謹案吳遠後易名遠平見杭州府志

李月桂字含馨關東人以貢生授忻州知州累擢江西督糧道滇閩之亂大兵雲集江西百姓流離者不可勝數月桂首倡捐資又時出倉米以振民饑無害逃亡如歸時江漕抗傲已久宦此者視爲畏途月桂獨久任釐剔竟以勞瘁卒於官

舊志

宋聲字收仲一字漫堂河南商邱人年十四以大臣子列宿衛康熙十七年自理藩院判遷刑部員外郎出權贛關除門征蠲舟算平權度商旅樂之還遷本部郎中歷官江蘇布政使擢江西巡撫時楚中兵變聲行至彭澤聞江西兵赴湖廣者以乏餼譁於九江亟檄湖口縣

出庫儲白金千資征兵行月委道員散給之眾兵乃前進聲至南昌甫數日有言舊裁督標兵與賊應者人情洶洶聲密訪通賊者置之法全省乃安江西歲采木料名官捐貲苛派聲疏請動支正帑毋借端以擾民又言甯州宜春等十二州縣夏秋旱螟請別輕重蠲賦十之二三又疏請清釐倉庫自藩庫由巡撫稽核外道庫責藩司府庫責道員察盤杜侵挪虧空之弊竝下部議行三十一年調江蘇巡撫官至吏部尙書加太子少師卒

本傳

舊志

查培繼字王望一字勉齋浙江海鹽人

原作海甯人

順治九

年進士由給事中山爲江西按察副使分巡饒南九道時寇亂初靖培繼力事拊循尤以興學校敦教化爲首

務建義塾禁淫祀愼蘆課捍水患拯饑民捐俸修白鹿

洞書院與諸生講學其中興賢育材造就甚眾

浙江通志

丁煒字澹汝一字雁水福建晉江人拔貢生歷職方郎

中分巡南贛贛固以產穀名民艘運米下行郡有陋例

會布政司檄郡徵其稅充定南協懷牙役藉以需求煒

因條地方十弊請於上官禁革之雅善吟詩能以文采

潤色吏治遷湖廣按察使

贛州府志

于成龍字北溟山西水甯人初由副榜貢生任廣西羅

城知縣累升湖廣武昌知府遷福建按察使郡人沿岸

遮送至九江者數萬歲庚申巡撫直隸明年總督江南

江西翦除豪吏大猾隱蠹舊弊神明洞察郡邑條具便

宜皆爲興舉嘗中夜苦饑索少米作糜不得遂笑而起

視事達旦上下餽遺都絕吏民安愉商旅輻輳關市流通每一令出父老扶觀有讀之垂涕者越三年以勞瘁卒官牀頭傲笥中惟綈袍一襲鞞帶二事堂後瓦甃米數斛鹽豉數器而已江甯人爲立祠於清涼山卹贈太子太保諡清端蔭子入監讀書陳延敬午亭文編謹案成龍治績雖非專屬江西其行事實足爲後世法爰依舊志錄之

高璜字渭師漢軍鑲黃旗人康熙九年進士改庶吉士歷江西學道始至卽以江西先正之文訓式士子一時士習咸知嚮古文風爲之不變尤振拔孤寒兩試榜出首列皆貧儒者宿人服其公歡笑滿衢巷士之貧者量以學租之羨給之學宮書院前賢名蹟之廢墜者捐俸復之亦罔有吝怠內升翰林院侍讀謝志

陳平字等奇福建海澄人始從遵義侯討海寇有功升左都督屯田萬安會三藩之亂四方騷動萬安崔苐亦聚黨數千殺官吏據城郭以應平率官兵攻萬安城克之斬其渠以獻錄功加二等當是時官軍在信州者餽餉不繼總督以屬平平悉力輓輸往返無所損軍帥知其才調征湖南至袁州而吉安陷乃留平守分宜彈壓吉安之賊尋從征龍泉有功晉榮祿大夫徙鎮南瑞卒年六十

熊一瀾撰傳

蔣毓英字集公漢軍鑲白旗人康熙二十九年任江西按察使南昌北城有飛沙擁積上接城雉盜賊得乘垣出入毓英捐資募夫糞除之盡且樹木柵以防之居民得以安枕三藩甫定河道尙多剽劫者州縣官匿不以

報毓英廉知之檄各縣編查船戶給以牌印至暮停泊則令守汛兵日以五船爲一伍十船爲一甲輪巡守宿質明放行由是河盜屏息嘗清理監獄冬製棉衣以給囚體恤備至及升浙江布政使眾囚聞之號泣者累日

八旗通志

馬如龍字見五陝西綏德州舉人康熙三十一年由浙江布政使擢江西巡撫恤民養士冬日常設廠煮糜以食貧民建豫章書院於省城倣白鹿洞遺規課士至今猶循其法卒於官

陝西通志

范承勳字蘇公一字眉山漢軍鑲黃旗人由廕生歷官雲貴總督行事堅定爲人平易深爲

聖祖仁皇帝所褒康熙三十三年以左都御史授江南江西總

督江西有漕四十八州縣自南昌新建外餘皆山僻糧艘不能直達需小船載米至省交兌民貼腳費官爲解運率以爲常其後州縣懼私派累載入賦役全書康熙二十六年漕臣以違例題叅照數追補而十載無一報完者至是承勳奏言官更數任已無可追民屬原賠難令再補若停腳價不給則僻處州縣之漕更慮遲誤請免追賠仍聽支給爲便部議不准

特旨如承勳所請行後遷兵部尙書加太子太保

本傳

王曰曾字偉度江南溧陽人康熙九年進士督糧江西釐漕政之弊多所豁免不以纖毫自私嘗疏河道以利漕船辛苦頻年操守益勵卒之日幾無以斂同官爲舉其喪焉

謝志

鄭昱湖北黃岡人康熙九年進士任江西督糧道凡四年故事造丁大造小修行月等銀率假手於吏以給或至後時昱特先期召至親給之吏無所容手而漕艘益堅康熙三十八年部議留江西漕十萬石於江蘇追弁丁行月等銀甚急昱再四泣請卒獲免追攝學使篆優書院諸生廩給釋冤獄甚眾士皆德之

舊志

劉蔭樞

進士題名碑作劉應樞

字相斗一字喬南陝西韓城人康熙十五年進士由給事中授江西贛南道贛舊有牙帖

銀協濟定南爲民病蔭樞計歲入置田以租充額牙稅永除郡守與鎮將比重門稅以朘民蔭樞悉革之修德孤臺建講堂尊經閣於山下以課士立清忠祠祀趙清獻文信國二公崇正黜邪鋤豪抑奢贛俗爲之大變累

官貴州巡撫

陝西通志

喬士容字德元山西猗氏人康熙六年進士由禮部郎中爲江西提學道萃諸生白鹿洞中擇學行兼至者主教事買田以供廩餼士咸懷之

山西通志

劉炎字介菴山東陽穀人康熙三十年進士視學江右時列郡文廟禮樂多缺炎刊聖門禮樂統一書散布學官俾修舉之課士舉業外別試他文辭日以立品敦行爲勛杜絕干謁苞苴不行去官日幾不能治裝巡撫郎廷極率屬捐俸以資其行

謹案謝志誤作康熙進士據題名碑改正

李基和字協萬一字梅崖漢軍鑲紅旗人康熙十二年進士改翰林院庶吉士累官湖北布政使四十三年擢江西巡撫時方大侵基和在武昌聞之貸銀以行過湖

口遇賈艘載粟東下卽出銀買之或更邀之轉左蠡入南昌米舟四集市價頓平乃以自買之穀發諸郡爲糜以振全省皆慶更生以次革陋規禁火耗平鹽價數月之中善政畢舉

舊志

張最湖北應城人康熙十二年進士

謝志作癸丑進士誤

四十三

年授江西鹽驛道爲政持大體不事苛細觀風十三郡所得才士爲多

崇祀錄

白潢漢軍鑲白旗人由筆帖式歷官湖南布政使康熙五十六年改江西布政使尋擢巡撫湖口縣關濱江風浪多不測關右武曲港可容千艘水易涸潢請疏濬港口建壩二以阻游沙加排椿以固之商民稱便江西科第之盛比於浙楚而鄉試中額轉不及潢疏請依浙楚

一例取中部議從之又言州縣因公挪移請照霉爛倉穀例限內全完准其開復如所請行潢在江西有清廉之譽其後因病乞內用累官至文華殿大學士

世宗憲皇帝以潢巡撫江西綏輯地方甚有裨益

優詔特嘉美焉

本傳

李鍾僑字世邠一字抑亭福建安溪人康熙五十一年進士雍正五年由編修任江西學政以崇經勵品課士士有速於訟者需其罪實而後褫之士論翕然高安朱軾每曰百年中無或並也被論罷官士林恆爲之太息

福建通志 李絳所撰墓表

王承烈字遜功一字復庵陝西涇陽人康熙四十八年進士改翰林院庶吉士散館授檢討雍正五年由湖北

糧道擢江西布政使爲政寬簡施設本於至誠善摘奸胥吏屏息有通吏二人擅竊威柄承烈斥弗用積弊爲清歲餘升左副都御史累官刑部右侍郎承烈天資剛毅推賢好士如恐不及所著有日省錄毛詩解尙書今

文解諸書

陝西通志

陳宏謀字汝咨一字榕門廣西臨桂人雍正元年進士改翰林院庶吉士散館授檢討乾隆六年七月由江蘇按察使遷江西布政使八月擢甘肅巡撫尋調江西卽疏陳通省水利會歲饑糶常平倉粟令富人毋過糶追官告糶於楚且招川湖之商人各載米至更設廠賑粥發帑修城垣築堰埭令民就食於工南昌城南羅絲港爲贛水所趨善衝突建石隄以禦之左龔朱磯當眾水

之衝往往泛濫爲災亦築隄百丈水患稍平江西居人
族大者多立宗祠置公田以通有無然好訟費皆出於
公田宏謀做呂氏鄉約令各舉賢者爲族正平其鬭爭
導以禮法且奏言有司自理之案動以無關考成延擱
拖累臣檄各道分巡所屬察實稟聞州縣官漸知警惕
得

旨實力督率毋使徒爲具文九年十月調陝西巡撫十一年九
月還任江西十月調湖北巡撫累官至東閣大學士卒

諡文恭

才傳 彭獻豐
所撰墓志銘

彭家屏字樂居一字青原河南夏邑人康熙六十年進
士乾隆六年由湖南按察使擢江西布政使時江西私
錢盛行荇葉鵝眼貫長不盈二尺民患苦之家屏立大

治準九府遺規命工鼓鑄於是泉貨流行無滯經用以饒豫章地窪下恆患沮洳鑿石修治使平者勿頗章門渡舟子橫索病行旅張諭禁止之違者必治粥廠振糜受者饑飽不能一爲定約束別男女計口授食弊乃除質庫違禁漁利痛懲其尤者大書市門金一兩準錢一緡及質毋阻行列郡以爲式辜坊大猾剽奪不受制家屏之攝巡撫也命吏捕誅之遠近帖然育人材恤士子揚烈表微廉頑立懦營鑿井十二於棘闈中供士飲漑修八隱之祠封婁妃之墓立文天祥謝枋得本主顏其祠曰大忠諸所施設皆釐然有當於人心焉

家傳

周人龍字雲上一字躍滄直隸天津人康熙四十八年進士由知縣進知府歷官山西湖北有聲乾隆六年擢

江西督糧道糧署素稱蠹藪弊叢生莫可究詰人龍至
宣條釐剔久之夙弊一清察吏嚴嚴巡所屬一周固固
冤抑多所平反褰帷行部守令彌憚其風采云

周麟撰傳

金德瑛字汝白一字慕齋浙江仁和籍安徽休甯人乾
隆元年一甲一名進士授翰林院修撰七年視學江西
江西山高水深士之嶽崎磊落者負氣矜奇所爲文或
未粹於理德瑛一以清真雅正爲宗學有本源言有根
柢皆拔而獎勵之童子十齡能默誦九經三傳者每節
取入學俗書破失爲正其譌誤刊布以示諸生由是士
奮然有志經史講求古學不復更從庸師習僥倖速化
之技士風爲之不變其後丁卯秋試榜發知名之士售
者十九試官錢陳羣旣嘆德瑛培養之功亦自幸衡鑑

之未爽焉在官歷升左庶子任滿還京師累官至都察

院左都御史

蔣士銓忠雅堂集左都御史檜門金公行狀

范廷楷字端植山東諸城人乾隆元年進士性峻直精於吏治十七年以戶科給事中巡漕通州獲江西浙江諸省運船計簿所載陋規之數甚晰據以入奏於是漕員得罪者百八十人旋同巡撫鄂容安郎中阿桂勘獄江右因署撫州府事慈祥惻悌愛士恤民俄升江西按察使贛州曾翊唐妻邱氏與姒鄧挈幼婢往索李姓逋邱猝發病死邱弟及翊唐誣李與鄧姦殺邱滅口知府使僕調其事僕受邱弟金覆如所控狀鍛鍊成獄詞連六十餘人廷楷鞠幼婢得實知府始猶力爭繫僕發其賊乃袒服陳臬歲餘平反七十餘案咸頌神明焉

撫州府志

胡寶琮字泰舒江蘇青浦縣舉人原藉安徽歙縣乾隆
間兩撫江西奏嚴查鄱陽湖船隻以靖積匪罷廣信開
山之議重封禁山以杜後患定豐城隄工歲修經久之
策江浙歲饑江西亦中熟因禁市僧居奇以通商販鄰
省賴焉調撫河南卒於任贈太子太保兵部尚書諡恪

靖

本傳

王張

董榕字念青一字漁山直隸豐潤人拔貢生乾隆二十
一年由九江知府擢吉南贛甯兵備道贛俗溺女錮婢
榕嚴禁之監督贛關除弊恤商行旅者稱便瑞金民聚
眾倡亂躬往諭以禍福遂解散性謙雅好士拓建書院
葺署東園廢池構豐臺與文士觴詠以母憂歸

南安府
贛

州府志

卷之三 統轄

三

謝溶生字容川江蘇儀徵人乾隆十年進士改翰林院庶吉士由編修歷官刑部右侍郎提督江西學政持躬廉介江西童試有連三卷銀及入學禮銀諸陋例溶生悉革除之時每試新增帖體詩試者多不習往往至覆試補詠溶生極力告誡於是有詩之卷漸多

揚州府志年譜

周煌字景垣一字海山四川涪州人乾隆二年進士改翰林院庶吉士由編修歷官內閣學士兼禮部侍郎二十六年提督江西學政崇實學正文體庠音集者明人所輯江西人作也兵燹後篇帙放失罕能舉其名者煌求得是書刪煩就簡付之剞劂新建裘曰修聞而喜之曰鄉先賢之風賴以不墜矣白鹿書院無講堂有司請

項修建議頗格煌言於巡撫明德事始獲行九江周濂溪祠田久廢煌首捐金買田俾德化令注之籍以爲祠產士民聞之遂各上先世所占買者不受田值積之得七十一畝合煌所捐遂盡復原額田八十餘畝之舊累官至左都御史加兵部尙書致仕卒諡文恭

本傳行狀

顏希深字若愚一字靜山廣東連平州人貢生乾隆二十七年由四川臬使調江西按察使至任數月清理積案五百餘事屬邑囹圄多空尋擢福建布政使調江西丁母憂歸三十四年仍授江西布政使饒州九江大水督屬散賑戒以毋漏且奏請道府監放以重其事希深凡三任江西深悉政要所陳奏皆切實可行累官兵部侍郎署貴州巡撫

本傳行狀

葛德溥字湛恩一字藹東山西安邑人貢生乾隆中由同知累升袁州知府折獄明允禮士崇文士民皆悅服其政三十四年擢吉南贛甯兵備道吉安府船埠累商德溥酌其制刊石郵亭以示萍鄉縣蘆溪宜風諸鎮當邑孔道故事有客保二人主官府供張胥役因以需索人歲納費數百金當之者甚以爲苦德溥亦勒石禁革其恤商惠民如此

行狀

王昶字德甫一字述庵江蘇青浦人乾隆十九年進士四十五年授江西按察使至官檄府縣力行保甲法禁族祠訟鬪之習坐堂皇六十餘日決獄百餘靖安民張起鳳毆死幼甥傷痕微渺久不決昶集府州縣之在省者三十餘人親往檢驗與眾共著之供詞乃定尋以憂

去服闋累遷江西布政使新友教書院創立規約修蘇雲卿祠於東湖之上官至刑部右侍郎

江藩漢學師承記 阮元學經

室集

王昶春融堂述庵先生年譜

邵洪字海度一字雙橋浙江鄞縣人基孫乾隆三十六

年進士五十七年授撫州知府歷署廣信吉安嘉慶元

年調知南昌府一以寬仁簡靜爲理平庶獄決滯訟時

有邵青天之目四年由湖南岳常澧道升江西按察使

遷布政使盡屏藩司陋例約束胥吏搜剔弊端又節其

養廉以濟公用如九江之兵房廣昌之城瀕江臨湖之

圩田隄岸皆立捐數千金不以累州縣而於屬僚舉劾

調補一秉至公羣吏競勸彌帑金至三十餘萬調安徽

布政使累官至禮部右侍郎

本傳

安徽通志 廣信府志

撫州黃定

文所撰
墓表

張彤字虎拜一字鄂樓浙江歸安人舉人由知縣起家所至有治行嘉慶四年任江西督糧道裁陋規清軍屯奏復僉丁舊例以蘇丁困官至山東按察使

湖州府志
王觀所

撰墓
志銘

蔣攸銛字穎芳一字礪堂漢軍鑲藍旗人毓英曾孫乾隆四十九年進士改翰林院庶吉士由編修累遷江南道監察御史嘉慶五年授吉南贛甯兵備道

上密諭巡撫張誠基曰察吏所以安民蔣攸銛江右之良才也汝其任用攸銛至官以正人心厚風俗爲先務瑞金民楊某兄弟爭產構訟五年不解提質婉諭之卒感悟去南康奸民邱家亮覬其弟婦財誣以姦攸銛立雪之坐

誣告者以罪孤寡得全廣東博羅縣會匪不靖與龍南
定南接壤親往堵截境獲安廣昌齋匪廖幹周等聚眾
爲亂攸銛往治激厲士民擒首惡誅之餘黨解散逾年
丁生母憂服闋歷官至體仁閣大學士兩江總督降補
侍郎卒

本傳

繩牒齋自訂
年譜 贛州府志

劉澐字晉陽一字澆堂山東單縣人監生選授撫州府
通判調臨江升南昌府同知歷署南昌廣信袁州府事
皆有政聲嘉慶七年由河南汝甯知府擢江西鹽法道
歲銷引例二十餘萬收令無責成多不及額澐力糾之
滯引漸疏疏署按察使事德化民被殺獲犯三人已服罪
澐廉其冤屢駁不允事得白大吏咸服其能累官至兩
淮鹽運使

盧蔭溥所撰墓
志銘 行狀

廖寅字亮工一字復堂四川鄰水人舉人嘉慶中由江蘇鎮江知府擢吉南贛甯兵備道寅爲人渾厚和平政無苛急而官吏肅然會昌匪徒糾黨勒民入會密令贛信豐二縣會哨擒匪首周達濱等置之法會昌以安安遠太平堡匪徒復熾縣官不能制寅從輕騎馳往諭以利害其地紳耆執首匪以獻而安遠之境復安莅贛七年恤士愛民惠政甚著升兩淮鹽運使

贛州府志
甘家斌撰傳

汪廷珍字玉粲一字瑟庵江蘇山陽人乾隆五十四年一甲二名進士授職編修嘉慶中以太僕寺卿任江西學政廷珍性嚴毅學有根柢以文章行誼高天下課士子立言之法以辨塗端本敬業裁僞自立五者爲歸所刻校士文曰立誠編典型先正無摹擬剽竊之弊操觚

之士家置一編風氣爲之一變歷官協辦大學士禮部

尙書卒諡文端

本傳
安府志 淮

王賡言字贊虞一字簣山山東諸城人乾隆五十八年進士嘉慶十四年由吏部郎中出知廣信府廣信俗健訟積案纍纍賡言日與判決皆得情感服以去浹月訟庭一空上官重其才每以疑獄與讞倚重若左右手先調署廣饒九南道再調補南昌府二十一年升江西督糧道習知糧艘江行運丁多載私貨且有糶所運米置貨至通倉補還者以故弊竇百出賡言先事禁誡稽查而杜絕之是歲糧艘至通州獨早船多餘米售之轉得善價所獲倍常貨於是運丁皆歡欣感頌而積習爲之丕變調江安督糧道二十四年仍調江西其年八月署

江西布政使明年又署按察使攝篆七月平反大獄甚多道光二年調補江蘇常鎮通海兵備道卒於官年六十有七賡言素工文章尤樂培士在廣信時倡修信江書院拓齋舍數十間置田益諸生膏火課卷親與講貫遇佳士輒獎借以成其名先後掇巍科者指不勝屈云

廣信府志

行狀

胡稷初名光榮字公望一字夢湘安徽廬江人觀濶子舉人嘉慶中任江西鹽法道值鹽引滯銷私販叢集稷請於上官減鹽價以敵私引遂疏暢又謂鹽法久敝無萬全之策惟置鹽官就場定價一稅後不問所之則官商俱可勿設而國與民兩利當時頗難其言兼署按察使餘干民袁姓與鄱陽民朱姓爭洲殺傷甚眾袁故世

業而年遠無可憑問者將坐袁罪稷檢二縣志得之遂
論朱以強占被殺袁得減死信豐地連浙閩豪民僦人
責鹽增私鍋三百餘戶大吏將悉處以大辟稷察知止
十餘戶乃治爲首者而笞遣其餘一時稱其平允章江
繞省垣如帶風檣往來多不測患稷特設救生船募善
泅者駕之以援溺者旅人安焉創建文天祥謝枋得專
祠修元俛列箴祠墓家富藏書巡撫阮元重刊宋本十
三經注疏稷助之力其互校之本亦稷所藏也以註誤
罷官卒年五十有九

廬江縣志
行狀

阮元字伯元一字雲臺江蘇儀徵人乾隆五十四年進
士改翰林院庶吉士散館授編修嘉慶十九年自漕運
總督調江西巡撫時豫東邪教初平餘黨煽亂餘干匪

目朱毛俚等僞託明裔謀逆元率臬司恆敏馳往擒獲
胡秉耀等十七名寘諸法得

旨嘉獎加太子少保

賜孔雀翎尋獲崇義進賢龍南長甯濫溪各會匪論如律民情
乃安元於學無所不通政事文章望重朝野其在江西
改建貢院號舍拓寬培高士樂坐臥而禁防亦嚴修省
城章江水間使水不泛濫校刻宋本十三經注疏散布
學官以救末學荒經之習士尤感誦之調河南巡撫官
至太傅體仁閣大學士卒諡文達

雷塘翁主
弟子記

戴敦元字士旋一字金溪浙江開化人乾隆五十八年
進士改翰林院庶吉士散館改主事道光元年任江西
按察使幕無賓客延屬吏之諳刑名者以自助不數月

清積贖四千餘獄某縣令素與敦元習以獲盜當遷秩令甲獲死囚三名以上者許送部不及則否及定讞擬辟不及三人令忒然失望敦元婉諭之曰君子愛人以德安可戕人命而遷己官乎是乃所以愛君也尋遷山西布政使累官刑部尙書卒諡簡恪

本傳 敦簡恪公遺集

程含章字月川雲南景東廳人舉人由知縣厯官山東巡撫道光三年調撫江西會九江水溢田廬多被淹含章疏請賑恤尋借款修築德化等處圩隄以衛農田時南昌諸府亦被水乃設粥廠賑民全活無算創建義倉及育嬰堂惠民甚至尤力培人材籌修白鹿洞書院量增膏火士林至今頌之

本傳

趙仁基字厚子一字悔廬江蘇陽湖人道光六年進士

初任宜春知縣補崇仁所至判決滯獄感格幽頑齋禱於深室而四境時雨立應累遷山西平陽知府道光十七年擢吉南贛甯兵備道益思有以自靖名捕椎埋盜鑄鹽梟大猾窮追而擒治之禁止鴉片約堅條明會英吉利窺天津陷定海寇廣東省城仁基綜理南安糧臺晨夜憂勞自傷無裨於時而海氛日棘往往被酒泣下或力疾繞室旁皇時已遷湖北按察使未及之官而卒時論惜焉

官同蕭求
關齋文錄

劉體重字子厚一字梅坪山西趙城人舉人由知縣捐升同知發江西歷署九江袁州饒州南昌四府同知補袁州府同知署南康臨江二府事道光四年擢廣信府知府調吉安歷官皆有惠政十三年知撫州府事撫俗

號多訟控於省者纍纍體重至官首揭三十六事於壁
檄傳研鞠逾月塵牘一清每聽訟必坐堂皇任士庶環
聽虛衷詰問譬以情理訟者咸耳傾心服卽受笞責無
後言歲比不登給將種議積儲皆出已資爲之倡創建
倉廩落成日適以升彰衛懷道去任民因題之曰劉公
義倉十九年升江西按察使一以治郡者治之州縣解
犯至司至卽上之院役無守候之苦而牘亦由是不稽
牒尤好士厯郡皆勤校課繩生童以禮及官臬使創爲
經訓書院月以經義辭章課士由是士知學古循行至
今云遷湖北布政使乞病歸卒

本傳 撫州府志
墓志銘 行狀

吳文鎔字甄甫一字雲巢江蘇儀徵人嘉慶二十四年
進士改翰林院庶吉士散館授編修道光二十一年任

江西巡撫汲汲以誠民弊吏爲心遇災侵畢力撫恤凡疏請緩征者七借給籽種者再民甚德之又以宋臣文天祥完行純忠足爲萬世法疏請從祀文廟

詔如其議

前後弋獲青蓮教匪戴理釗古魁連及南嶺會匪謝

詞封等九十三人皆論如律在江西八年百廢具舉二十八年調浙江巡撫累官兩湖總督咸豐四年死黃州之難謚文節祀京師昭忠祠

本傳

吳文節公年譜

孫瑞珍字符卿山東濟甯州人道光三年進士改翰林院庶吉士散館授編修二十三年以太僕寺卿任江西學政就遷內閣學士晉兵部左右侍郎瑞珍性嚴重試日危坐堂皇不少假息訓諸生極摯而束胥吏稽槍替懷挾之弊極嚴犯必不少恕多士凜凜終其任無敢犯

者及瑞珍去官久髦士思其風采猶推重焉官至戶部

尙書卒諡文定

本傳行狀

周玉衡字潤山湖北荊門州人由舉人大挑知縣發江西明斷善折獄勤於緝捕歷任州縣有聲咸豐二年自贛州知府擢吉南贛甯兵備道五年授江西按察使留兵備道任總理吉安軍務其年十月粵賊石達開分黨竄江西連陷郡邑玉衡率勇九百人進剿次臨江會廣東別賊陷泰和玉衡退保吉安賊踵至圍之與戰不利乃斂眾入城固守賊頻次攻城皆督兵勇擊卻久之援饌皆絕六年正月城陷玉衡與子恩慶俱力戰死之事

閩贈布政使諡貞恪

江西忠義錄

甯都直隸州志

張弔字黼侯一字小浦陝西涇陽人道光十五年進士

改翰林院庶吉士由編修累遷詹事府少詹事二十三年充江西鄉試正考官二十九年以吏部右侍郎督江西學政咸豐二年八月署江西巡撫十一月粵西賊洪秀全等竄入湖南陷岳州江防戒嚴帶奉

命往九江防堵十二月實授巡撫時宜黃邊錢會匪及武甯鹽

匪聚黨橫恣帶密授所屬方略不旬月俱報肅清明年粵匪陷九江帶自瑞昌還省乃修城濠築礮壘檄徵援師練兵積穀爲固圉計五月賊入犯南昌湖北按察使江忠源率精騎先賊三日至帶自念將略非所習又察諸將才無愈忠源者乃大集將吏於庭下延忠源坐再拜以兵符授之令一切得專制忠源素英果任事又感帶至誠益出心力相堅守自五月至於八月賊屢攻屢

卻迄不得逞遂以二十三日宵遁省城獲全四年以事
被議落職再起督徽甯軍務十年請假回籍尋督辦陝
西團練事宜同治元年單騎撫臨演叛回遇害追論守
江西功

特謚文毅竝於江西省立祠以祀初粵賊之東下也南昌知府

鄧仁堃策賊必至創議爲豫備計修城築壘之役皆自
仁堃發之及賊至從芾守禦尤力賊卒以城堅解去仁
堃字厚甫湖南武岡州人拔貢生官至江西按察使

本傳

江西忠義錄 橋

案 鄧厚甫家傳

蔣啟敷字玉峯廣西全州人道光二年進士以知縣發
江西歷任煩劇皆有聲二十八年援例爲道員二十九
年署鹽法道事三十年廣東翁源始興諸縣盜起啟敷

以道員奉檄往贛南防禦駐師梅關分兵守險禁謠言
勸團練出入有稽禁防嚴密賊一犯龍南輒敗去四境
晏然咸豐元年再權鹽法道事時淮南議行票鹽勢多
扞格吳城奸民因聚眾劫掠鹽肆啟墩捕治以聞且陳
西岸情形及票鹽得失狀總督陸建瀛題其議奏調至
揚州佐理鹽政未及行擢河南分守河北道五年六月
署河南山東河道總督十月還河北道任六年以勞疾
卒啟墩官江西久精於吏治所至行保甲興水利約胥
役清詞訟前後二十餘年如一日贛龍南二縣多會匪
俗獷悍難治啟墩作訓俗邇言又上贛郡利病書言補
救之術皆切實可行龍南民爭地誤傷官臨川樂平貴
溪廬陵民相率鬪酒貴溪民又倚眾罷考啟墩皆以片

言定之論貴溪死罪者四人餘並從輕比不煩兵而地方卒以無事南昌新建歲饑郭外例有粥振或白大府易以錢人三百民趨若鶩會湖北流民亦至啟敷憂之請別籌振恤之法弗許令罷錢復粥啟敷曰復粥驟民弗知也又弗聽已而赴食者十二萬人粥不給洵洵將入城大吏欲以兵遏之啟敷復力爭曰饑民意無他拒以兵是導之亂也惟仍給錢耳乃亟榜通衢示以期而分棚以渙其勢事遂定明年乃豫請移贖鄰封斷流民入境盡復施糜舊法非至貧不能冒於是就食者驟減

至二萬人

東志銘

汪報閏字桐階江蘇山陽人廷珍次子以父廕官部曹出守甘肅憂歸起補南安知府咸豐四年賊圍韶州廣

東援絕南雄知州孫福謙乞師於報聞報聞先後調勇
越境再援之韶州圍解署吉南贛甯道六年賊陷吉安
諭紳民團勇以備四月賊合信豐零都土賊薄城下勢
張甚報聞竭力防禦度江西無兵可援而守陴兵勇又
不足乃求救於粵東粵督故與報聞有連又以再援韶
州義當報爲遣潮州總兵壽山至大戰於城外東關圍
遂解民皆尸祝之先是贛稅甲江右軍興後課不及額
大吏以咎報聞時方授福建延建邵道未行赴省聽勘
悵悵成疾而卒

江西忠義錄 南安府志

馬濟美字覲廷雲南建水人由世襲騎都尉積功至副
將咸豐三年任九江鎮總兵賊圍南昌濟美方自都至
巡撫命統城外各軍屢敗賊城防益固濟美偵知賊中

精銳略盡夜緇城入請發精兵會攻眾難之濟美曰今賊勢已衰不因此時出擊時當秋成使賊得因糧於民眾飽無去志其若軍事何我將門子知有戰誠不能久居園中知府林福祥語侵之濟美益憤翼日賊攻濟美營濟美擊敗之孤軍逐北伏起遂遇害馬氏三世死賊濟美以捍城殞身士民尤悲之事

閻優卹予諡襄愍

本傳江
西忠義錄

江忠源字常孺一字岷樵湖南新甯人舉人官浙江知縣以憂歸粵賊起團鄉勇擊賊積功至湖北按察使咸豐三年奉

命幫辦江南軍務自湖北行次九江賊之由金陵上駛者前隊已抵彭澤省城戒嚴巡撫張芾檄忠源赴援遂率所部

疾馳四日至亟下令火城外民居火未盡而賊至當是時忠源部卒僅千五百人南昌兵勇萬餘無習兵事者而城下之賊且數十萬賴忠源嚴整有威芾亦以事權相畀得一意設施百計禦賊隧道城守益完賊分竄旁郡以圖牽制忠源復約援師擊平之賊不得逞凡六十餘日而圍解加二品頂戴尋擢安徽巡撫賊陷廬州發憤投水死事

聞

天子震悼贈總督諡忠烈廬州及湖南江西皆立專祠忠源弟忠濟字汝舟從援江西守章江門當賊衝親冒矢石賊穴地攻城城再塌忠濟奮死力拒斬先登之賊且戰且築城復完累擢道員五年勦賊通城戰死同治元年追

謚壯節豫章之民言忠源兄弟無婦孺皆尸祝焉

求闕齋文

鈔

江西忠義錄

謹案粵匪之亂官非守土而樹勲烈於江西者援漢灌嬰元巴延市哈德濟之例擇尤著

者列之宦績餘見府縣志及忠義錄不備書

羅澤南字仲嶽一字羅山湖南湘鄉人諸生舉孝廉方正咸豐二年粵賊圍長沙澤南練鄉兵擊賊有功明年五月賊犯江西省城澤南越境援勦破賊安福斬數百人南昌圍亦解又明年復武昌漢陽率師東下大敗賊於黃梅廣濟聞賊盡撤沿江諸壘併力守九江是時澤南已累功保至道員至是授浙江甯紹台道加按察使銜留營勦賊於是引兵南渡攻圍九江進規湖口賊堅守不可遽下會別賊陷饒州弋陽澤南往援大戰弋陽克之賊陷廣信又戰克之禁兵勇入城土寇鈔掠百姓

歸者見屋舍倉箱如故相與迎拜泣下又以其聞收復德興景德鎮東路甫定而義甯州復陷澤南軍渡湖漢而西至則示形杭口而陰進鼇嶺屯高峯以瞰敵設三伏要之四戰而賊大燬義甯旣克

詔加布政使銜澤南寓書侍郎曾國藩具論吳楚形勢欲復九江湖口必先清江漢上游然後有濟遂自義甯追賊湖北略通城克崇陽大捷蒲圻咸甯壁武昌之洪山賊窮蹙待命無何以霧中搏戰中鎗子傷創甚卒於軍時六年三月八日也

詔依巡撫例賜卹諡忠節三省建祠二子皆賞舉人

求闕齋文鈔 江西

忠義錄

李續賓字迪庵湖南湘鄉人從同里羅澤南講學咸豐

三年澤南率勇援南昌續賓從焉初至失利右營訓導
謝邦翰戰歿續賓代領其眾自是澤南將中營續賓將
右所向有功克復泰和安福四年半壁山之戰記名以
知府用尋補安徽安慶府知府會攻九江不克五年二
月廣信告警續賓與澤南馳援迭克郡縣西援武昌復
屢捷六年三月澤南中鎗卒續賓并將全軍眾志逾厲
遂克武昌漢陽敘功加布政使銜記名以按察使用湖
北既清九江之賊益困乃掘長塹以圍之又分軍援勦
江北舟載奇兵夜襲湖口之背遲明水師至續賓率陸
師自湖口後山騰躍而下賊大驚盡殲其眾湖口梅家
洲二城俱復擢浙江布政使明年四月卒克九江賊無
一脫者天下快之晉巡撫銜

賈穿黃馬褂旋奉

命勦賊廬州次三河鎮賊四集我軍銳氣日渫師少而半潰續
賓怒馬陷陣死之

文宗手詔悼惜贈總督諡忠武錫騎都尉兼雲騎尉世職湖北

江西安徽湖南四省皆立祠同治三年晉世職爲二等

輕車都尉

宋開濟文鈔
江西忠義錄

塔齊布字智亭滿洲鑲黃旗人咸豐四年以副將破賊
湘潭授湖南提督率軍東下十一月破黃梅賊賊奔據
湖口與九江相犄角爲死守計乃會羅澤南渡江攻潯
陽盡毀附郭營壘澤南旋移軍盩山斷賊外援塔齊布
以一軍營城下屢敗賊會水師被賊襲喪失輜重澤南
攻小池口亦不下賊勢遂張塔齊布馳驅四應勇氣彌

厲深爲羣賊所憚五年正月城賊出襲我軍小池口賊亦渡江來助塔齊布大敗之時曾國藩治戰艦南昌澤南亦援饒塔齊布以孤軍與賊久持賊不敢出乃益治攻具期大舉七月十八日傳令攻城忽忠氣脫日中遂卒

賜諡忠武卹廕如例塔齊布治軍嚴而有恩卒後有數卒至樟

樹鎮適大雨立民家戶外民延之入不入曰公在令部

卒不得入民房今公雖死忍背之乎言已泣下聞者亦

泣其感人之深如此

本傳 江西忠義錄 譚案塔齊布忠勇過人爲一時名將之冠所

乘馬絕有力名追風

湖北岸嘶鳴不食莫日鄉民導塔齊布歸親附之乃食及其卒也馬悲鳴三日喪車過南昌

馬隨行將入城忽汗

鞍轡如負重者人謂塔齊布靈爽實憑之云

之云

劉開泰廣東惠來人咸豐四年授南贛吉袁臨總兵五年官軍克義甯州開泰與署知州林懋勳扼險據守其年冬賊石達開竄渣津官軍戰不利時開泰駐軍杭口簡精銳迎擊敗之明日賊設伏山谷中戰佯北逐至溪口伏起開泰督諸軍衝突逾時手斬十餘賊會衣爲礮火所熱方解衣賊刃隨至遂遇害鬻割無完膚事

聞

賜諡果烈子以亨同戰死開泰所乘馬悲鳴尸側不去賊酋顧

曰良馬也命牽去馬輒蹶鬻人立賊怒殺之

江西忠義錄

龍啟瑞字翰臣廣西臨桂人道光二十一年一甲一名進士授翰林院修撰咸豐六年以通政司副使視學江西未至遷布政使時軍事孔亟庫藏久虛啟瑞勞心焦

思權衡籌度饒糈賴以不竭頻歲旱蝗齎心祈禱力求
驅捕之法蝗患頓除嘗勸民積穀備荒復以暇修普濟
育嬰諸善政惠心澤民都邑感慕以勞卒於官

行狀
稿案

蕭啟江字溶川湖南湘鄉人咸豐六年石達開竄江西
陷袁州臨江諸府啟江時防瀏陽從道員劉長佑進擊
復萬載縣移師袁州賊援大至都司田興恕單騎入陣
啟江麾勇繼進賊大敗會崇陽通城賊犯瀏陽意官軍
回援乘夜來襲啟江蓐食以待值大霧賊不知我軍多
寡大敗之進攻袁州屢敗援賊復其城明年冬臨江亦
復擢道員加按察使銜八年四月會諸軍復撫州晉布
政使九年援贛州以計破石達開之眾復南安府解信
豐之圍江西郡縣次第皆復轉戰湖南廣西尋率師援

蜀十年四月卒於軍。照巡撫例議卹。諡壯果。湖南江西皆建祠。啟江之平江西也。與田興恕偕。啟江善謀興恕善戰。故所向克捷。治軍嚴所至不擾耳。重聽人呼爲蕭聾子。聞蕭聾子名皆合掌頌禱。賊望其旗幟心懼色駭。往往潛師而遁云。

江西忠義錄
平定粵匪紀略

江忠義字味根湖南新甯人。忠源從弟。咸豐七年楚軍劉長佑勦賊臨江。忠義以知縣募勇千人往長佑任以營務。從復臨江。崇仁勦吉安。新城賊俱有功。轉戰湖南累擢至道員。署貴州巡撫。廣西提督。同治二年皖賊竄饒州境。時江楚諸大吏爭奏調忠義勦賊。諸將謀所向。忠義曰。江西不支東南瓦解矣。吾敢避難而趨易乎。卽疏請援江西。命前部席寶田自饒州先進破賊壘十餘。

六月忠義至湖口賊自文橋迄太平關連營三十餘里
伺官軍所向乘其後忠義初至申嚴約束他軍之擾民
者縛治之民大悅爭探賊謀來告乃馳視形勢定計攻
賊戰於文橋敗之回軍擊太平關又敗之賊懼不敢出
忠義分兵斷文橋之後而令前軍示賊以懈使降人誘
之賊悉眾來攻伏起賊首黃文金受重創遂大敗黃文
金者賊稱黃老虎最驍悍諸酋所聽命者也既被傷羣
賊奪氣遂由太平關遁江西肅清其年九月感疾就醫
南昌十一月次吳城鎮卒贈尙書諡誠恪安徽青陽江
西湖南皆建祠初忠義之入江西也寓書巡撫沈葆楨
曰治賊當清其源使任封疆者皆以吏治爲亟承平可
立俟也當時以爲名論

江西忠義錄

王鑫

一作鑫

字璞山湖南湘鄉人諸生團鄉勇擊賊積功

至道員咸豐七年春率師援江西勦賊臨江樂安屢獲大勝斬賊酋何勝權胡壽階兩廣悍黨略盡賊爲之奪氣進擊永豐之韶源賊連壁十餘里背水爲陣鑫軍猝至勢如風雨賊驚亂多墮水死乃積尸爲梁以濟軍軍畢濟斬賊蕭復勝以下二千餘級連戰古夏東壩斬賊將張宗相獲偽印二十有四賊楊宜清楊輔清憤其眾屢敗糾黨十二萬人據廣昌之頭陂謀分眾迭戰下令前列敗卻則後至者以火器擊殺前列以次繼進期必死鑫偵得其謀喜曰賊眾分擊之需時聚而殲之一戰可定也於是縱兵迎戰馳馬先士卒陷陣賊大潰逐北六十餘里斬首萬餘僵死者相屬於道陂水盡赤自鑫

錫勇號

渡贛江九十日大捷十二俘斬之多是戰爲最

日愛什蘭巴圖魯會吉安官軍敗請援鑫令團勇張鑫旗如將趨建昌者以疑賊自引兵至樂安誘撫州宜黃援賊至城下敗之明日大破賊於崇仁之太平市又明日逐北至林頭賊騎兵四千突陣鑫令牌軍斷馬足而以勁卒出賊右賊遂大潰獲馬千二百匹生擒八百人會疾作旋師樂安越數日卒加布政使銜諡壯武江西湖南建祠鑫用兵善出奇以少擊眾所部號老湘營以別於眾將士亦翹然自異戰旣屢勝軍中號鑫王虎賊亦虎之望旗輒走必易旗乃得一戰故鑫平生所將不越三千人而摧數十萬驍悍之寇斬首四萬餘級誅賊將二百人湘楚諸名將未能或之先焉治軍嚴而有恩

眾樂從其教嘗課軍士以書喻以淺近人人皆得其解
軍中書聲琅琅然遇賊則荷戈致死賊退恂恂如儒生
巾服樸素不尚繒綵人望之卽知爲鑫部云鑫從弟開
化字梅邨鑫部將湘鄉張運蘭字凱章皆力戰江西有
功開化累擢至道員加布政使銜卒諡貞介運蘭官福
建按察使殉難諡忠毅

江西忠義錄

帥遠燁字抑齋湖北黃梅人道光二十七年進士授編
修咸豐七年以道員留江西補用時粵賊石達開踞撫
州遠燁與副將周鳳山隨九江鎮總兵李定泰往守東
鄉規進取方抵大南橋賊踵至軍潰遠燁被執罵賊死

賜諡文毅建專祠

江西忠義錄

曾國藩字伯涵一字滌生湖南湘鄉人道光十八年進

將江長元都司畢定邦等開城出擊賊敗竄興安七年擢廣饒九南道留辦信防九年乞養歸十年投吉南贛甯道襄辦江西全省團練葆楨以親老力辭同治元年超擢江西巡撫諸軍分道束征賊勢日蹙謀撓後路以絕饒源屢犯饒廣邊界葆楨馳赴廣信增各縣礮堡益兵以守賊死咋不能入以是諸軍得成大功江甯平餘孽西竄官軍沿路追剿遊擊周家良獲偽幼主洪福瑱於石城

詔嘉葆楨功賞一等輕車都尉加頭品頂戴葆楨嘗言吏治與兵事相倚伏吏治不飭則亂源不塞故雖軍事倥傯而懲貪舉能勤求民瘼孜孜不少怠與總督曾國藩同心爲治興革利弊地方日有起色四年假歸旋丁母憂六

年起爲船政大臣光緒元年擢兩江總督五年卒

詔贈太子太保諡文肅予立功諸省建祠平定粵匪紀略廣信府志蘇撫

吳元炳奏
廣續輯

宦績錄四 南昌府

漢 吳玠

梅福字子真九江壽春人爲郡文學補南昌尉時成帝

委任王鳳京兆尹王章以譏刺鳳死福上書不納居家

常以讀書養性爲事至元始中王莽專政福一朝棄妻

子去至今傳以爲仙其後人有見福於會稽者變姓名

爲吳市門卒云漢書謹案梅福於南昌無政績可紀
以其首祀名宦仍依舊志錄入亦居官

願節之
微意也

周生豐字偉防太山南武陽人建武七年爲豫章太守

清約儉惠

據後漢書馮衍傳注引豫章舊志及一統志補

李忠字仲都東萊黃人光武時爲右大將軍建武二年

從平龐萌董憲等遷丹陽太守三公奏課爲天下第一

遷豫章太守

後漢書時至豫章

謹案李忠治狀在爲丹陽太守則史無所述以舊志久著存之

張躬永平中爲豫章太守豫章東太湖十里二百二十

六步北與城齊南緣迴折至南塘水通大江增減與江

水同躬至郡築塘以通南路兼遏此水謂之南塘水有

所瀦人皆德之今南塘灣猶其遺蹟

舊志南昌府志

劉寵字祖榮東萊牟平人以明經舉孝廉除東平陵令

仁惠爲吏民所愛母疾棄官去後四遷爲豫章太守清

約省素家無貲積

後漢書

樂巴字叔元魏郡內黃人以荊州刺史李固薦徵拜議

郎使徐州還遷豫章太守郡上多山川鬼怪小人常破

貲產以祈禱巴素有道術能役鬼神乃悉毀壞房祀剪

理奸巫於是妖異自消百姓始頗爲懼終皆安之

後漢書

陳蕃字仲舉汝南人舉孝廉除郎中出爲豫章太守性

方峻不接賓客士民亦畏其高惟敬禮徐孺子特設一

榻去則懸之徵爲尚書令送者不出郭門

後漢書陳蕃傳

謹案蕃爲豫章太守見後漢書本傳舊志謂蕃無守豫章事誤

陳修字奉遷烏傷人家貧爲吏步擔上下恆食乾糧每

至正臘偃臥不起同僚飲食虔請不一往遷豫章太守

計月取俸受米不受錢十日一炊不然官薪布被覆體

南昌府志

華歆字子魚高唐人獻帝時拜豫章太守禮請徐孺子

爲政清靜不煩吏民感而愛之

後漢書徐釋傳注

孫賁字伯陽吳郡富春人堅同產兄也領豫章太守在郡十一年卒子鄰字公達年九歲代領豫章在郡垂二

十年討平叛賊政績修理

三國吳志

太史慈字子義青州人劉表從子磐驍勇數爲寇於艾西安諸縣孫策於是分海昏建昌左右六縣以慈爲建昌都尉治海昏並督諸將拒磐磐絕迹不復爲寇孫權統事以慈能制磐遂委南方之事建安十一年卒

三國吳志

潘璋字文珪東郡發干人也遷豫章西安長劉表在荊州民數被寇自璋在事寇不入境比縣建昌

今奉新縣非南康府

之建昌縣也

起爲賊亂轉領建昌加武猛校尉討治惡民旬

月盡平

據三國吳志補

顧邵字孝則吳郡吳人年二十七起家爲豫章太守下車祀先賢徐孺子之墓優待其後禁淫祀非禮之祭小吏姿質佳者輒令就學擇其先進擢置右職舉善以教風化大行在郡五年卒於官

三國吳志

謝景字叔發南陽宛人赤烏四年出爲豫章太守在郡有治績於徐孺子墓前建思賢亭吏民稱之以爲前有顧邵其次卽景數年卒於官

三國吳志

孟宗字恭武江夏鄘人爲豫章太守人思其惠路有行歌故時人之生以孟爲名

據太平御覽二百六十二引孟宗別傳補

晉

張暢才思清敏志節貞勵秉心立操夙有名譽除豫章

丞爲陸機所薦詔拔用之

南昌府志

甘卓字季思丹陽人元帝初渡江授卓前鋒都督揚威將軍討周馥征杜弢屢戰多所擒獲以功拜豫章太守卓外柔內剛爲政簡惠善於撫綏卒贈驃騎將軍晉書

王稜字文子琅邪臨沂人渡江爲元帝丞相從事中郎從兄導以稜有政事才宜守大郡乃出爲豫章太守加廣武將軍稜知從兄敦驕傲自負有罔上心日夕諫譴敦不能容潛使人害之弟彬亦苦諫敦幾爲所害俄以爲豫章太守別有傳略

謝鯤字幼輿陳國陽夏人少知名通簡有高識左將軍王敦引爲長史敦將爲逆謂鯤曰劉隗奸邪將危社稷吾欲除君側之惡何如對曰隗誠始禍然城狐社鼠也敦怒曰君庸才豈達大理出爲豫章太守莅政清肅百

姓愛之

書

劉允字承允東萊掖人王敦請爲右司馬知敦有不臣心託疾不視事以是忤敦意出爲豫章太守郡人冀鴻南土豪族因亂殺本縣令橫恣無道百姓患之允至誅鴻及諸豪右界內肅然賜爵豐城子歷平南將軍

書

庾條字幼序潁川鄆陵人初辟太府宰累遷黃門郎豫章太守豫章黃韜自稱孝神皇帝臨川人李高爲相聚黨數百人乘犢車衣皂袍攻郡縣條討平之卒官贈左將軍

書

殷羨字洪喬陳郡長平人爲豫章太守都下人士因其致書者百餘函行次石頭皆投之水中曰沈者自沈浮者自浮殷洪喬不能爲作致書郵其資性介立如此終

於光祿勳

晉書殷浩傳

韓伯字康伯潁川長社人清和有思理留心文藝舅殷浩稱之曰康伯能自標置居然是出羣之器舉秀才徵佐著作郎並不就簡文帝居藩引爲談客遷豫章太守

入爲侍中

晉書 謹案韓伯傳無豫章政

范甯字武子南陽順陽人少篤學多所通覽爲豫章太

守在郡大設庠序遣人往交州采磬石以供學用改舊制起學堂遠近至者千餘人資給眾費一出私祿并取郡四姓子弟皆充學生課讀五經由是江州人士並好經學郡城先有六門甯悉改作重樓復更開二門合前爲八

晉書

孫潛字齊由太原中都人爲豫章太守殷仲堪之討王

國寶也潛時在郡仲堪偪以爲諮議參軍固辭不就以

憂卒

晉書孫盛傳

鍾案舊志晉有孔冲梅頤兩傳皆無江西官績所錄又其師友之事今刪

宋

蔡廓字子度濟陽考城人起家晉著作郎爲太尉參軍以方梗開素爲宋武帝所知景平元年出爲豫章太守初漢張躬築南塘後江水每於夏月溢塘而過多水害廓乃西起隄開塘爲水門水盛則閉之內多則洩之自是居民少患徵爲吏部尚書

宋書昌府志南

齊

王綸之字元章琅邪臨沂人永明中歷位侍中出爲豫章太守下車祭徐孺子許子將墓圖畫陳蕃華歆謝鯤

像於郡堂爲政寬簡稱良二千石

南史

袁昂字千里陳郡陽夏人永明中出爲豫章內史丁所
生母憂去職以喪還江路風潮暴駭昂乃傳衣著柩暫
同沈溺及風止餘船皆沒惟昂船獲全咸謂精誠所致

南史

顧憲之字士思吳郡吳人永明中爲豫章內史在任清
簡務存寬惠有貞婦萬睇者少孀居無子事舅姑尤孝
父母欲奪而嫁之誓死不許賜以束帛表其節義憲之
屢經宰郡資無擔石及歸環堵不免饑寒

南史

梁

鄭伯倫天監初爲豫章太守時江州刺史陳伯之反伯
倫起郡兵拒敵伯之率眾攻豫章伯倫堅守不能下高

祖遣王茂引兵至表裏夾擊敗之伯之奔魏

梁書陳伯之傳

謝舉字言揚陳郡陽夏人天監十四年由侍中出爲甯

遠將軍豫章內史爲政和理甚得民心

據梁書補

張緬字元長范陽方城人爲豫章內史爲政任恩惠不設鉤距吏民化其德亦不敢欺故老咸云數十年未之

有也

梁書

伏暉字元曜平昌安邱人性儉素車服羸惡初爲永陽內史在郡以清潔稱治務安靜爲吏民所懷改豫章視事三年徵給事黃門侍郎領國子博士卒徐勉志其墓曰東區南服愛結民胥相望伏闕繼軌奏書或臥其轍或攀其車或圖其像或式其閤思耿借寇曷以尙諸

梁書

邱仲孚字公信吳興烏程人武帝時累遷豫章內史在

郡以清節聞卒年四十八喪將還豫章老幼號哭攀送

車輪不得前

梁書

張綰字孝卿范陽方城人大同五年出御史中丞出爲豫章內史在郡述制旨禮記正言義四姓衣冠士子聽者常數百人安城人劉敬躬挾妖道聚黨攻郡轉寇南康廬陵屠破縣邑有眾數萬進寇豫章新淦縣南中久不習兵革或勸綰避其鋒綰不從修城隍設戰備募敢勇士得萬餘人旬月間賊黨平復入爲御史中丞加通直散騎常侍

梁書

袁君正字世忠昂子早得時譽爲豫章內史性不喜巫邪有師萬世榮稱道術爲一郡巫長君正在郡小疾主簿熊岳薦之師云須疾者衣爲信君正以所著襦與之

事竟取禱云神將送與北斗君君正使檢諸身於衣裏

獲之以爲亂政卽刑於市而焚神一郡無敢行巫

南史

蕭勵字文約武帝從子自宣城遷豫章內史道不拾遺
男女異路徙廣州刺史去郡之日吏人悲泣數百里中
舟乘填塞各齎糧以送至新淦縣所山有一老姥以盤
擎鱸魚自送舟側奉上之童兒數十人入水攀舟或歌

或泣舟爲之歎

南史

胡穎字方秀吳興人梁末陳霸先軍頓西昌以穎爲巴
邱令鎮大皋督糧運下至豫章以穎監豫章郡霸先率
眾與王僧辨會白茅灣同討侯景以穎知留府事承聖
初元帝授穎羅州刺史尋除豫章內史入陳爲左衛將

軍

南史

隋

榮建緒北平無終人開皇中爲洪州刺史有能名

據一統志

補

謹案舊志有洪州總管豆盧通蘇孝慈兩傳今移入統

轄

唐 南唐 附

吳兢汴州浚儀人少勵志方直寡諧當路薦直史館書

法簡核不少假借世人目爲董狐坐貶荊州司馬以史

草自隋累遷洪州刺史表臧嘉猷劉資虛之里以勵風

俗

舊志

韓朝宗京兆長安人開元中以山南東道採訪使坐所

任吏擅賦役貶洪州刺史在郡乞罷貢梅煎以乳柑代

之天寶初召爲京兆尹

嘉靖林志

謹案唐代洪州刺史大率以觀察等使爲之舊志

多列統轄故
所錄止此

王邁天寶中爲南昌令時元宗在蜀南北梗否有中官
過洪州求取無厭邁欲按之謀於權舉舉良久不答泣
曰今何由致天子使而遽欲治之掩面去邁悟厚謝之

唐書權
舉傳

馮儀爲豐城令性廉明有田父詣令求決事凌晨飯蕨
至中路稍饑就肆求麪久不獲乃去肆人固責麪金田
父不與訟於縣儀以茶飲之而置桐油其中田父盡吐
所食餘蕨在焉肆家乃伏罪

唐餘
紀事

宋

何慈太平興國六年爲新建縣主簿領縣事時縣新設
慈擇地得南唐林仁肇故宅始創縣治在任公恕民咸

德之

嘉靖林志

王明字如晦大名成安人宋師伐南唐明以黃州刺史江路巡檢率所部舟師破江南將朱令贇於小孤山擒令贇詔明安撫諸郡因命知洪州太宗卽位兼領江南諸路轉運使方明師入洪州時或以城不卽下當屠之明心謂不可謬與其眾約曰吾入城觀變爾等視吾鞭仆則加之戮否則勿殺一人比入舉鞭以示城於是獲

全

宋史南昌府志

袁逢吉字延之開封鄆陵人開寶八年擢三傳第釋褐清江尉知州王明薦其能就除豐城令明年又與轉運使張去華條上治狀以春秋博士召咸平中知江州累官鴻臚少卿卒

據一統志及宋史本傳補

樂崇吉字世昌開封封邱人少爲吏部令史累官祠部郎中明習文法清白勤事眞宗時擢江南轉運使代還後遷司農少卿知洪州有司歲斂民財造舟崇吉至奏罷之

宋史

李虛己字公受建安人中進士第以尙書屯田員外郎通判洪州虛己迎其父寅及寅母至豫章樂其山水遂臨東湖築第以居眞宗時進給事中知洪州上嘗稱其儒雅循謹云

宋史

盛度字公量杭州餘杭人舉進士第累遷尙書屯田員外郎改開封府判官坐決獄失實降監洪州稅起知建昌軍三司鹽鐵判官後遷太常少卿知筠州又知虔州度在洪州時建請復賢良方正科又請建四科以取士

曰博通墳典達於教化曰才識兼茂明於體用曰軍謀宏遠堪任將帥曰明曉法律能按章覆問其後夏竦議置六科蓋自度言始也

宋史

唐肅字叔元杭州錢塘人七歲能誦五經舉進士以工部郎中知洪州廉靜寡欲初至檣舟南康徘徊不進或問其故曰職由以四月爲期今遽之得無獲趨利之譏乎逾月乃至人皆愧服

南昌府志

葛源字聖宗

原作宗聖據王安石墓志

處州麗水人大中祥符

五年進士仁宗時爲洪州司理參軍州將之甥與異母兄毆人實甥殺之州將脅源曰兩人皆吾甥而殺人者乃其兄也源不聽卒正殺者之罪源先嘗爲泰和簿攝吉水令事吏舞弊者悉置諸法有毛氏寡婦訟其子源

諭以恩義不從密使人覘之有與閒語者捕得乃謀誣其子者也窮治具服縣距州遠民輸賦不便源始議卽縣置倉至今泰和民無輓運之苦云寶慶四明志 豫章書 泰和縣志

陳良器仁宗時通判洪州值大水城不沒者十五吏民惶擾不知所爲良器具薪藁不終日塞之闔城頌曰無

陳公吾屬魚矣

豫章書

趙槩字叔平南京虞城人中進士第知洪州州城西南薄章江有汎溢之虞槩作石隄二百丈高五丈一作丈五尺以障其衝水不爲患僚吏鄭陶僥倖挾持郡事爲不法前守莫能制州之歸化卒皆故時羣盜僥造飛語曰卒得廩米陳惡有怨言不更給善米且生變槩不答卒有自容州戍逃歸而犯夜者斬之以徇因收陶僥抵罪闔

郡股栗

宋史

張瓌字唐公滁州全椒人舉進士知洪州營校督役苛急其徒三百人將以夜殺之求不獲持鎗謀於門請易校瓌召問諭遣明日推治黥十人不爲易校

宋史

沈嚴字叔寬湖州德清人大中祥符八年中禮部第四登甲科除南康軍判官有善績改宣城節度掌書記時

國家興山澤之利主計薦嚴監洪州武甯茶場尋兼領

本邑事吏畏其廉民愛其慈及卒貧不能葬太守滕元

發爲葬於縣之永和鄉

據范仲淹所撰墓志及宏治湖州府志補

吳雄字慶錫長汀人紹聖閒知靖安縣嘗以五事勸民

十詩諭俗其自注孝經亦於風化深致意焉

豫章書

劉幹字仲偃建州崇安人紹聖閒爲豐城尉首嚴游徼

之令廣設方略鄉邑以清及歲饑盜作他邑率捕殺希賞給曰此饑民救死耳率豪右出穀振濟躬自收恤多所全活後死於靖康之難

嘉靖
林志

楊告字道之其先綿竹人爲豐城主簿邑有賊殺人投屍於江人知主名而畏不敢言告聞親往擒賊有言賊欲報怨者告不爲動旣而果乘夜欲刺告告又捕致於法境內肅然再調南劍州判官

宋史

張商英字天覺蜀州新津人知洪州興起學校會歲澇開東湖以洩水民無水患大觀中入爲右僕射

南昌府志

王渙之字彥舟衢州常山人漢之弟末冠登元豐五年進士上第崇甯閒知洪州淡於仕進每云乘車常以顛墜處之乘舟常以覆溺處之仕宦常以不遇處之則無

事矣

宋史 詳案宋史本傳不詳洪州政績乘車數語則仕宦之名言也仍依舊志錄之

周積建炎初知靖安縣慷慨有才略會金騎犯境居民皆竄伏積集義兵屯要地爲保障計邑賴以全事聞特

授宣教郎

豫章書

陳敏識建炎中知分甯縣金騎至江右牧守望風避去敏識獨抗義死守縣境卒全宣撫使張浚請升縣爲義

甯軍擢敏識就知軍事不許浚子栻爲文誌其事

明一統志

胡連字宗偉建安人紹興間知豐城縣築隄捍江六鄉

皆免水患嘗采輯邑志又祀唐王季友於學之東序以

式多士

豫章書

劉鎮字可叔温州樂清人紹興十八年進士任隆興府司法有重囚九人獄已具鎮察其冤復讞得實告於郡

悉免之移武義丞

據萬應溫
州府志補

李宗質字文叔濮人以蔭補將仕郎累官新建丞紹興

二十年差知瑞昌縣饑寇作於旁郡或告豪民將率數
百人犯邑亟捕首惡斃之羣黨帖息孝宗時通判隆興
府時江西大旱力振之全活者眾倅廳有贏資頗豐宗
質義不受一錢悉以致之公帑官至朝散郎浙東提刑

據樓鑑政
槐集補

吳芾字明可台州仙居人舉進士第累官知隆興府因
其俗爲寬猛吏莫容奸民懷惠利嘗曰視官物當如己
物視公事當如己事與其得罪於百姓甯得罪於上官
以龍圖閣直學士致仕退閒者十有四年自號湖山居

士

宋史

江介乾道間知進賢縣事會歲饑詔蠲租入之半介白
部使者程大昌曰但減其半民猶未堪也若自全戶三
升以上悉與蠲則貧民被實惠矣介嘗言民飢而食之
猶子飢而母乳之敢幸賞乎其實心撫恤如此

明一統志

程迥字可久應天府甯陵人家於沙隨徙紹興之餘姚
登隆興元年進士第調饒州德興丞盜入縣民齊矧家
平素所不快者皆冒絰逮獄迥辨其冤者縱遣之矧訟
不已會獲盜甯國矧猶訟所縱之人迥曰盜旣獲矣再
令追捕或死於道路使其骨肉何依豈審冤之道哉改
知進賢縣民饑府檄有愬閉糴及糴與商賈者迥卽論
報之曰力田之人細米每斗才九十五文偏於稅賦是
以出糴非上戶也縣境不出貨寶苟不與外人交易輸

官之錢何由而得今强者羣聚脅持取錢毆傷人者甚
眾吾民不敢入市坐致缺食申言再三見從乃已縣大
水亡稻麥郡蠲租稅至薄迴白於府曰是驅民流徙耳
賦不可得徒存欠籍乃悉蠲之郡僚恐戶部不從迴力
論之曰唐法損七則租庸調俱免今損十矣夏稅役錢
不免是猶用其二也不可謂寬議乃息境內有婦人傭
紡春以養姑姑感婦孝每受食卽以手加額仰天而祝
之其子爲人牧牛亦乾飯以餉祖母迴廉得之爲紀其
事白於郡郡給以錢粟調信州上饒縣歲納租數萬石
舊法加倍又取斛面米迴力止絕之嘗曰令與吏服食
者皆邦民之膏血也橫斂虐民鬼神豈無知乎州郡督
索經總錢甚急迴曰斯錢古除陌類今三倍正賦民何

以堪反復言之當路奉祠去迴居官臨之以莊政寬而
明令簡而信緩強撫弱導以恩義積年讎訟一語解去
猾吏姦民皆感激後悔欺詐以革暇則賓禮賢士陳說
詩書勢位不得以交私祠廟非典祀不謁隱德潛善無
問幽明皆表而出之以勵風俗或周其窮阨俾全節行
聽決獄訟期於明允凡上官所未悉者必再三抗辨貴
溪民僞作吳漸名誣懇縣令石邦彥迴言匿名書不當
受轉運使不謂然遂興大獄瘐死者十有四人及聞省
寺訖報如迴言

宋史

沈雲舉字鳳翔乾道間知奉新縣事置沃壤以養士蠲
圭稅以修陂直分屍之獄雪白骨之冤政以最聞邑德
之立祠以祀

嘉靖林志
南昌府志

張仲方字萬春金華人淳熙時知隆興府事大旱禱雨
審獄活囚人稱異政仲方見國事日非嘆曰滿朝皆婦
人但知和議謂不共戴天之讐何具疏言恢復大計不
報遂解印綬隱南昌之松亭里

豫章書

張奭字叔保亳人徙家廬陵淳熙中官隆興府決曹掾
豫章自建炎兵餘民多死徙租賦罅漏貧富倒置公私
俱病奭白府請檢校冒耕之田府命其檢校新建武甯
二邑期月得實以報下其法於諸邑郡賦始均邑繪像
祀之紹熙五年通判洪州以考績三轉至朝請郎時趙
鞏蔡戡相繼爲帥事無大小悉以屬之秩滿除知永州
據楊萬里所撰行狀補

汪義和字謙之徽州黟縣人淳熙中任餘干丞尋宰新

建歲大侵府檄義和視之而使人私焉曰幸以郡計爲念義和蠲十之八帥怒其專不爲動乃黽勉從之八縣饑民均被其惠時方治東湖名勝役夫數千人工五十餘萬義和言取諸邑豈免追胥賦於近郊徒滋游手於饑民無與且游觀之所非今所急議由是寢

據袁聚齋集補

高南壽字景仁福清人淳熙間知奉新縣事大旱禱於城隍神有願減十年壽乞爲三日霖之語歲饑白連帥振廩勸糴荒政具舉朱子守南康聞之曰使吾屬皆如高令尹吾何憂乎民爲之立祠

嘉靖林志南昌府志

王正邦字榮甫明州人善詩尙氣節不苟取與淳熙間知奉新縣事爲政有操縱事至而應無成心振窮乏時婚姻恤死喪援孤苦皆盡誠爲之

安志

張瑄慶元中知奉新縣事爲民減營田之賦上之州不可請益堅不勝孤憤欲解印綬去邑人王謨舉幡率眾以留之曰甯民病弗失賢宰今雖不得請後有賢帥與宰意合必得之矣未幾龍圖張杓來帥豫章瑄又請得之民相賀曰微張君不能爭吾民難爭之賦政聲由是大著

豫章書

韓遜嘉泰中知隆興府事奏隆興惟分甯產茶他縣則否豪民武斷者乃請引窮索一鄉使認茶租非便於是詔非產茶縣禁民擅認茶租

據一統志補

豐有俊字宅之慶元府鄞人紹熙元年進士嘉定初任隆興府判值歲大疫挾醫巡視察病投藥全活者眾請復府社倉自南昌新建二邑始郡捐錢千萬擇士之堪

信任者分糴之以待用將漕胡槻運米二千斛助成之
重浚東湖築隄植柳創建東湖書院以館游士升知建

昌軍

據南昌府志
及鄞縣志補

王居安字資道黃巖人淳熙十四年進士以集英殿修
撰知隆興府初盜起郴州黑風峒羅世傳爲之倡勢張
甚湖南所在發兵扼要衝義丁表裏應援賊乏食少懈
主兵者稍堅持之則就擒矣會江西帥欲以買降爲功
遣人閒道說賊餽鹽與糧賊喜謀益逞帥以病卒繼者
蹈其敝賊陰治械外送款身受官峒中不至公府義丁
皆悲曰作賊者得官吾儕捐軀壞產業何益於是五合
六聚各以峒名其鄉李元勵陳廷佐之徒並起爲賊放
兵四劫掀永新撤龍泉列城皆震朝廷調江鄂兵屯衡

贛而他兵駐龍泉者吉守節制之率師往幾爲賊困池
兵來援失利朝廷憂之遂以居安爲帥居安以書曉都
統制許俊昂以必戰俊得書惶恐不敢以他帥事居安
居安督戰於黃山勝之賊懼走韶州爲摧鋒軍所敗勢
日蹙吉守以招降召侮爲居安所劾奉祠去居安遂節
制江池大軍駐廬陵督捕領郡事召土豪問便宜皆以
賊據險鈔糧爲慮居安曰吾自有以破之會元勵執練
木橋賊首李才全至居安厚待才全而賞元勵眾皆感
羅世傳果疑元勵貳已遂交惡元勵率眾攻世傳居安
語俊曰兩虎鬪穴吾可成卞莊之功矣世傳陰使練木
橋賊黨襲禽元勵以獻時青草峒賊亦就禽並磔於吉
之南門元勵旣誅世傳恃功驕蹇名效順而實自保俊

請班師居安不許俾因賊壘固守亡何世傳果與兄世

祿俱叛居安密爲方略遣官與民兵合圍之世傳自經

死斬其首以徇羣盜悉平居安之在軍中也賞厚罰明

將吏盡力始終用以賊擊賊之策故兵民無傷者江西

人祠而祝之刻石紀功

宋史及收功均足爲後來者法

志敘述太簡今據宋史本傳增補又曹彥約傳則以下賦爲彥約功與此微異然不逮此傳之詳也

楊方字子直長汀人任武甯丞廉靜平易人皆化之先

是學租每爲司計者乾沒方至量出入積羨以供祭器

之用轉知靖安縣

豫章書謝志原案縣志作楊芳自題詩有云堂上官人似野人村人相

見且相親又云高陂約水歸田急

不管灘聲入縣門其風致可想

程璠字仲韞河南人知豐城縣事適江水環城民大饑

邑豪吳氏藏粟閉糴璠召諭不從謂曰民饑且死令亦

不敢自保祿位當杖汝取之吳大懼如命於是富人爭出粟民用以濟璠資識高爽有過人者凡山川道途人物名氏耳目見聞者久而不忘在任三年識其民且半矣

明統志

真德秀字景元後更爲景希建之浦城人登慶元五年進士第嘉定閒知隆興府承寬弛之後乃稍濟以嚴尤留意軍政欲分鄂州軍屯武昌及通廣鹽於贛與南安以弭汀贛鹽寇未及行以母喪歸明年蘄黃失守盜起南安討之數載始平人服德秀先見

宋史

樓大年字元齡義烏人登嘉定十六年進士令南昌治先教化建利去病洞察民隱有殺其讐者賂給其甥就辟甥自陳殺人狀甚悉大年疑之縣丞與府錄事受賕

使焚屍以滅迹大年正色抗辨上之憲臺推官重讞事始白民敬之生爲立祠及去攀轅留者綿數十里遷奉議郎通判吉州提刑李迪以大年廉慎命錄一道滯囚未幾攝郡事江東大姓查氏掠幼弟貲產六十萬爭訴二十年不解大年舉張詠決于堦爭財故事命歸其弟人以爲允歲終吏白公帑錢粟羨餘前官例納大年斥之以助軍餉及周宗室之貧者尋升朝奉郎卒官年七

十

宋文憲集

劉卿月字昇叟合沙人清祐間知豐城縣事介潔簡易其治以辨名分尚禮義爲先修城浚濠建社廣學百廢具舉又築濱江隄五百丈至今享其利焉

豫章

蔡舉開慶中知靖安縣事元兵入境或勸之少避曰死

則死耳豈可忘君以避難哉竭力守城一方賴之

豫章書

任滄景定初知分甯縣北兵蹂江右縣當其厄繼而羣盜四起滄與民效死禦之寇去則捐己俸節浮費以供

一切之役規制一新

豫章書

謹案舊志有余靖揚長孺留正三傳靖惟撰一遊記無他政績其貶知饒州則宋史述范仲淹之事非靖也長孺見吉安府列傳不應復登宦績並刪之留正傳事屬贛州今改列贛州府

元

賈全甄城人宋德祐元年任隆興運判廬陵劉槃以城降元諭屬邑順附豐城民懼而徙者十九井里蕭然明年元帥府鑄豐城縣印卽以授全全爲政一本仁恕撫慰安集民悉還未幾盜發臨江撫州越境驅掠全單騎往救獲免蹂躪南征師過境上哨騎橫出全百方調護

居者案堵士民建祠祀之

南昌府志

陳元凱字時舉河東人以行省郎中爲富州尹經理學宮重修講堂改鑄祭器公退卽單車詣學訓勉諸生從遺老講求民瘼考政治得失而興除之一時善政畢舉

南昌府志

昌和爾

原作創元兒

回回人任豐城縣達嚕噶齊

原作達明魯花赤

於爲政嘗有郭招討軍人舟行過境死於盜事聞省路委同知鄭某會郭招討出捕郭欲盡屠瀕江民昌和爾曰吾已檢覆知爲河寇於民何與乃直前辯白謂不得請則將入奏郭乃斂兵去邑四面皆水頻歲增修隄防又築墻數百丈民不告匱戶口日增及升縣爲富州卽授州達嚕噶齊興學崇化政理一新

豫章書院南昌府志

劉宋字君疇至元閒以宜黃丞奉檄攝龍興庾受米平概略無取於民參政胡漢卿時方爲甯州判官甚異之及尹新建漢卿爲參政待之甚厚宋居劇縣決訟如流上下無不信服

嘉靖林志

謹案尹新建謝志誤作尹新昌據南昌府志新建縣志改正

阿刺威河西人大德初授武略將軍富州達嚕噶齊州境歲受水患馬湖壩衝決損田四十頃阿刺威至築隄三百丈又修境內壞隄六十四處鑿石禦衝水復故道歲屢有秋

嘉靖林志

完顏璧河陽人大德閒爲進賢縣尹廉明公恕愷悌愛人嘗以輸賦稽緩受府笞璧恐民聞而懼也反召耆老慰安之民益感激爭先輸納惟恐爲賢令累賦畢登城

縣志

布時齊

原作李

回回人任進賢縣達嚕噶齊十年吏畏

民懷始終如一他州縣不能決者憲府時委剖之卒於

官

南昌府志

圖列圖

原作彙

字仁卿蒙古人至治間爲進賢縣達嚕

噶齊威以攝吏德以懷民常修陂墻八百餘所民甚利

之

萬惡南昌府志

謹案舊志

高復禮字仁卿河南人爲富州尹到官屏謝請謁門庭

闕然一小蒼頭給事左右而已臨政出言不易公退閉

戶讀書清儉自守饘粥外無異味始終如一以疾卒於

官

豫章書

陳世榮字顯卿莘縣人泰定中爲進賢縣尹時詔有司

造軍器世榮驗租數以爲多寡刻程集事民不擾明年

大饑捐廩祿爲粥以給隨聞於上乃下振故饑而無傷
於民在縣政平訟理嘗曰民可殘也天可誣乎以老致
仕民不聽其去築室南郭以留之

豫章書
南昌府志

程大度爲南昌縣尹事上以禮待下以寬政平訟簡庭
無紛譁一時學校多其修創嘗編豫章續志卒於官

據南

昌府
志補

綽哈

原作
湖海

札拉台氏

原作札
刺台氏

由國子生入官爲靖安縣

達嚕噶齊至正十二年斬黃賊起綽哈與縣尹黃紹集
義兵爲禦賊計未幾賊兵數萬由武甯來寇紹赴行省
求援綽哈獨率眾與戰於象湖大破之乃起進士胡斗
元塗淵舒慶遠甘棠等謀畫而以勇士黃雲爲前鋒自
二月至八月戰屢捷擒賊將洪元帥而賊黨益盛黃雲

戰死軍挫衄綽哈遂被圍尋爲賊所執殺於富州子明

安圖

原作民安圖

襲父職爲本縣達嚕噶齊十三年率眾敗

賊將復縣治十四年賊兵復至明安圖迎戰力竭賊執

而弔之

元史忠義傳

楊宗訓字源清洛陽人以蔭授甯州判官至正十二年

春永興武甯寇數千人入境宗訓率義士莫以中吳德

文祝與可等與賊拒戰俘馘甚多進勦清溪賊佯敗設

伏宗訓力戰不支爲賊所殺德文等亦被擒死之

嘉靖林志

謹案

宗訓等死事狀詳見南昌府志此依舊志存其大略

特穆爾

原作帖木兒

色目人任武甯縣達嚕噶齊至正十二

年土寇張普憲率眾攻城勢甚危急特穆爾募勇士出

戰臨行謂主簿楚彥曰我輩受國家恩委身報效在此

時也不可爲此賊屈遂麾眾迎戰於東關外不勝死之

楚彥亦死

嘉靖林志
南昌府志

安謙河閒人至正閒任龍興路總管政尙清簡沈毅明

斷至於退强寇興學校尤加意焉後人爲立德化碑據南

昌府志補

趙把總佚其名爲奉新縣把總至正十三年秋賊萬餘

自武甯靖安至行都元帥府遣把總領兵百餘迎擊敗

之賊退把總以中流矢死民哀而祀之

據南昌府志補
謹案趙把總

以徵弁殺賊死綏保全境土志乘闕略竟佚其名猶幸
事實可徵不至湮沒用補錄之以著衰絰闕幽之美
謹案舊志有張昇傳昇官江西儒學提舉攷元史百官
志惟江浙湖廣江西三省有儒學提舉司係省不置
是儒學提舉爲轄全省儒學之官非路教授
比也故南昌府志不列昇名今改入統轄

明

葉琛字景淵浙江麗水人博學有才藻以薦徵至應天授營田司僉事尋遷洪都知府佐鄧愈鎮守降將祝宗康泰叛琛被執不屈大罵死之追封南陽郡侯立像耿再成祠後祀功臣廟明末追諡貞肅

明史白志

但元行湖廣安陸州人洪武元年任武甯知縣兵燹之後城野悉空元行招集流亡民以案堵修城垣興水利勃興始事卒於官繼任者爲錢塘盛文郁字東民益擴元行之政躬至田閒督民墾荒疏水植柏樹於學宮與諸生講學民食其德至今憩柏下者猶不忘盛公手澤

云謝志南

昌府志

趙文奎洪武初知南昌府莅事剛嚴措置有法凡百興作既集而民不知勞去後猶思慕之

明一統志

許方浙江鄞縣人洪武三年以薦知南昌府盡心民事
勸課農桑尤惓惓學校常夢一儒者曰吾廬冒風雨久
矣幸太守新之覺後莫詳所以及謁徐孺子亭觀其像
如所夢因修葺焉

豫章書

史彬字文質獲鹿人元進士明初由戶部郎中謫富州
吏目值流寇嘯聚設方略贊知州強立擒斬招降賊遂
潰民獲案堵修學校築隄墻勤敏公惠卒於官

豫章書

朱宗晦華亭人洪武間知靖安縣愛民禮士潔已奉公

修壇壝興學校治橋道勸農桑政聲懋焉

明一統志

林弼字唐臣一字元凱福建龍溪人洪武初知豐城縣
以文學飾吏治孜孜愛民士高其行民頌其德時比之

卓魯云

豫章書
南昌府志

梁璧泗州人洪武初知進賢縣事廉明果斷囹圄空虛

吏民感之爲立清政坊於邑前以志不忘

南昌府志

秦泰洪武中任南昌知縣勃於撫字民有不率者以五

教諭之延禮儒生刑清政簡既去而民常見思

明一統志

何昭善字憲章浙江淳安人洪武間舉孝廉二十八年

任豐城縣丞舉行安上利民之政公廨學舍橋梁隄墻

之屬多其經畫升奉新知縣

豫章

周秩字公壘安鄉人宣德鄉舉任南昌府學教授學徒

例有公費秩積存之至五百餘金悉供修學之用不以

自私提學夏寅屬秩衡文高下悉當其文行爲時所推

重卒於官士皆惜之

豫章

璩鎮海常山人宣德間任奉新知縣莅政廉勤鋤強植

弱歲饑振濟有方縣學田畝科米一石七升租重民困

奏蠲十分之二民咸感其德

豫章書

王來字原之浙江慈谿人宣德二年以會試乙榜授新建縣學教諭上疏言甯府每祭祀取郡邑諸生備樂舞演習經旬有妨學業宜以附近羽流充之不足則用護衛軍餘子弟禮部覆奏如議頒各王府著爲例設樂舞生自此始累官至南京兵部尙書

南昌府志

胡本惠南直隸銅陵人永樂鄉舉授戶部主事正統閒擢南昌知府篤實有才愛民如子甯損上以益下剖紛摘伏策應裕如郡人鍾曰儒行特高本惠致之郡齋薦爲本學訓導居常衣無重襲食無兼味秩滿去不攜南昌一物歷官右副都御史巡撫遼東

南昌府志

劉琛字廷貴湖廣沔陽州人正統六年進士任甯縣知縣嚴厲果斷聽訟能得民情吏無所容蔽境內肅然

嘉靖

林志

陳純字希文浙江錢塘人舉人正統間任奉新知縣有

惠政吏部以聞賜楮幣樽酒

明一統志

張冲字宏謙福建龍巖人正統初任進賢知縣廉明強

幹禮士愛民勸學宮築城垣增圖籍置義倉撫民如子

時有瑞蓮靈芝野蠶成繭之異秩滿奏留復任又九年

卒於官百姓巷哭祀之

進賢縣志

尚祹字景福河南羅山人正統四年進士擢監察御史

天順三年以言事左遷豐城知縣剛毅敢爲不畏權勢

時鎮守太監某假進獻名橫索民不堪命多棄產以逃

獨豐城畏褻無敢擾後升廣東僉事

豫章書 萬曆南昌府志

李廷聰湖廣益陽人景泰舉人任豐城知縣有治才會

洪水衝隄幾盡廷聰募材力興工委主簿黃璵董其役

璵用塞張秋河法治之卒成堅隄廷聰性坦易樂與民

習縣民一見輒知其人呼姓名無或謬者

豫章書 南昌府志

聊讓字公遜南直隸巢縣人景泰五年進士天順中任

南昌知縣政主愛民守禮執法不徇上官意指時鎮守

中官恃恩恣橫有所苛取讓輒納冠帶求去中官愧而

留之自是不敢有加於讓民尤席其庇焉

豫章書 謹案舊志誤作

蘭溪人天順進士據國子監進士題名碑改正

呂聲

榜姓

字廷和浙江崇德人

原作桐廬人誤

景泰五年進士

天順閒任進賢知縣敏捷有才幹凡所修舉功能立就

邑常多疫聲翦爪齋沐禱於神七晝夜不少怠疫隨息

明年復作又齋禱請以身代民死疫又止人咸感之

明一

統志謝志原案進賢縣志聲作古選以訓蒙作嫁女歌以訓俗建社學數十區間左災聲稽顙禱籙風反火息虎爲民患盟諸神

羣虎伏誅升太僕丞

張翥字汝振南直隸長洲人天順元年進士成化閒出

刑部郎中出知南昌府性剛鯁以名節自許達於吏事

剖決如流中官王慶怙勢索珍玩翥一無所與臨行挾

翥上舟將挫辱之民號擁登舟奪以歸升廣西參政終

雲南按察使

安志昌府志南

黃窩字世用福建閩縣人成化二年進士除武甯知縣

時有勾致流屍折其脅骨誣爲仇家所毆者前令久不

能決窩至視所傷曰骨爲毆傷胡從內而折之外邪誣

者遂服時有冰鑑之謠升戶部主事

豫章書

周芳字廷桂浙江山陰人舉人成化中授豐城知縣豐城地大戶繁牒訴輻輳日以千計芳無所阿避察詞燭理是非立剖無牘留龍潯洲在遠鄙與鄰境谿洞相構扇爲盜芳募民縛其渠魁民賴安息故事商賈須給繙爲道里憑率入資於令歲可千緡芳捐以繕學及資水利之當興者尋以外艱歸

據獻徵錄補

祝瀚字惟容浙江山陰人成化二十三年進士歷刑部郎中宏治間擢南昌知府戴星視事廉明有威時京奏臺訴者株連至千百人瀚一切不問惟對面繆繫之相去徑寸寢息甚艱未幾多自解息園土一空出公費墾田二萬畝以贍諸生築圩五百餘處俾圩長督之至今

名祝公隄焉又修郡志移郡獄擴郡治基政成有靈鵲
巢梁馴雁隨車之異時宸濠勢漸熾瀚每裁抑之甯府
有鶴帶牌者縱於道爲民家犬所噬王官希意牒府抵
罪瀚批其牒曰鶴雖帶牌犬不識字禽獸相爭何預人
事宸濠卒不得逞後以中傷罷去民爲立祠

安志

張汝舟字濟民南直隸崑山人成化舉人宏治閒任南
昌府同知剛正廉明上下信服毀淫祠鞭妖鬼修忠臣
之廟表高士之墓忠清氣揚幻妄俗革巨寇徐九齡猖
獗率眾往捕爲寇所遮部下民兵熊玉金挺身代死汝
舟得脫擢思南知府

豫章書

劉璠字士約湖廣麻城人宏治三年進士授豐城知縣
臨政嚴明庭無私謁凡民間均徭徵銀諸項明載其數

加印以給小民令依期執帖以納吏不能侵邑有給引

錢前令俱入私橐遂悉留資公用惜任未久卒

豐城縣志

張伯祥名瑞以字行浙江鄞縣人舉人宏治十八年任

靖安知縣莅政清勤每折獄必至夜分而退諄諄然以敦本善俗爲事嘗著省民條約及條約發揮二書使家傳而戶誦之新昌胡雪二盜馬下獄有求釋之者伯祥不可曰我欲死之諸君欲生之爲靖安害必斯人也後

雪二果聚黨馬腦山人服其明

靖安縣志
甬上耆舊傳

鄭翫字信卿南京驍騎右衛籍浙江平陽人宏治十二年進士授新喻知縣以循良徵遷刑部主事歷郎中出爲高州知府調繁南昌始至值甯王宸濠氣燄薰灼翫獨不附之歲時宴遣一無所與遇羣小不法者輒依法

問遣凡百需索皆弗應宸濠積恨既深遂誣奏下獄獄
煅煉瀕死及變作猶械繫於舟獻乘其怠脫身登岸鼓
舞義士且戰且行以所獲逆徒與馬奔獻都御史王守
仁守仁慰勞之委以原職因備陳賊情并蕩平之策多

見采納後擢河東鹽運使

南昌府志

李承勛字立卿湖廣嘉魚人宏治六年進士由太湖知
縣歷工部郎中遷南昌知府正德六年贛州賊犯新淦
執參政趙士賢靖安賊據越王嶺瑪瑙崖華林賊又陷
瑞州諸道兵不敢前承勛督民兵進勦數有功華林賊
殺副使周憲憲軍大潰承勛單騎入憲營眾乃復集都
御史陳金卽檄承勛討之賊黨王奇聽撫搜得其衷刃
縱使還奇感泣誓以死報承勛令奇密入砦說降其黨

爲內應而親率所部登山奇夜拔柵官軍奮而前降者
自內出賊遂潰已從金斬賊渠羅光權胡雪二華林賊
平鎮守中貴黎安誣承勛擅易賊首王浩入獄詞坐下
吏大理卿燕忠卽訊得白舉治行卓異超遷浙江按察
使仕至兵部尙書卒贈少保諡康惠

明史

吳昂字德翼浙江海鹽人宏治十八年進士授宣城知
縣調繁新建方宸濠未敗時日張爪牙索租稅刻甚民
弗能堪遂結寨丁家山拒之宸濠大譴曰新建民反諸
大吏莫敢言昂獨以爲民有激而然不可謂反乃昌言
於宸濠曰民非敢抗殿下也田廬妻子不保勢極而生
變此可以理法散未可以威力驅宸濠領之昂單騎入
山呼父老子弟諭以禍福皆搏額謝應時解散已而歲

饑公私無備民大困昂立抽補法以振全活者數十萬人尋升南京刑部主事累官至福建右布政使乞休歸

安志 南
昌府志

萬士賢廣東南海人宏治鄉舉正德六年任靖安知縣
瑪瑙崖之變士賢鑄兵器訓戰士築城鑿池建敵樓佐
知府李承勛討平之宸濠反遣宋一作祥四涂景七募
瑪瑙黨士賢執祥四等斬於南港橋以定眾志隨興義
兵助王守仁討禽宸濠兵燹之後捕餘寇恤瘡痍省刑
節用建射圃以校藝立社學以養蒙治教聿興民至今

稱之南昌府志

毛騭字汝健湖廣應城人一作麻城人舉人正德閒任武甯

知縣淵博有鴻才公餘卽就儒學授諸生經營謂文不

本六藝雖博科名無用也時民俗樸野乃刻四禮圖注陸士衡兄弟論以示勸學宮祭器不備鑒範銅爲之至

今尙有存者

豫章書
南昌府志

吳嘉聰字惟德山西振武衛籍湖廣湘陰人正德六年進士除豐城知縣建昌寇徐九齡屯據醴源嘉聰奉檄夾勦先登破袋嶺擒賊首顏曰和等築縣土城後宸濠變起賴爲保障累遷南昌知府承己卯變後株連從逆者甚多囹圄皆滿乃創新監以繫麗輕典者日夕窮訊豁無辜以千計升按察副使

南昌府志

孫璋字希學浙江鄞縣人正德六年進士任南昌知縣時宸濠勢張政多掣肘璋維持調護保全一邑爲多邑濱江田多沙塞璋入覲疏減沙米之賦以甦民困窮鄉

德之後擢御史

豫章書志
應南昌府志

汪穎字秀夫湖廣江陵人宏治鄉舉任南昌府通判攝奉新縣事均徭役革誅求民戴之若父母正德七年從周憲戰於華林憲遇難穎猶裹創力戰事聞升本府同知以兵夾擊建昌醴源賊斬其渠徐九齡敘功第一擢

九江知府

豫章書志
南昌府志

羅恪字質甫應天江甯籍浙江秀水人正德三年進士授中書舍人疏乞就養抵家父卒服闋擢袁州知府都御史王守仁薦其才改贛州復以都御史盛應期薦又改南昌莅任七月聞母病竟棄官歸久之復補南昌郡人夾轂迎之曰我父至矣輅聽斷明恕以時勸課農桑循行勞來靡不周至南昌號大治擢按察司副使整飭

饒撫兵備以思母上疏乞休未報又棄官還家五月而

母卒人益以爲孝感云

舊志南昌府志南

方印字欽佩爲南昌衛指揮使正德五年饒州姚源洞寇起印奉檄督兵戰於畚塘俘斬有功尋與寇遇梁山坂力戰不克被執死之詔祀萬年縣錄後加襲一級後以子恩任署都督僉事贈印如其官

豫章書

牛鸞字鳴世直隸獻縣人正德三年進士由山東僉事左遷知甯州才識明敏剷除夙弊境內晏然尤善鞫獄不假筆楚而情僞立辨囹圄空虛當道移文事或有非便者抗論不屈卒如所請乃已時鎮守太監怙寵暴橫誅求斑竹野錯諸物州人洶洶鸞叱縛其人致鎮守府且寄聲曰吾不憚面君以救此一方民矣太監素知其

名事竟寢擢太原府同知歷山東按察副使

豫章書南昌府志

姚永禎字文瑞南直隸華亭人正德舉人任進賢知縣值歲荒流盜肆劫永禎率民兵保東關賊不敢犯後臺司遣將進剿闢帥誅求甚厲永禎竭蹶支應瀕於挫辱而終不以擾民卒於官士民思之

明一統志

王紀字理卿南直隸泰州人正德六年進士任進賢知縣邑舊無城會庚午盜起郡縣雲擾紀度地築之邑賴以障尋平姚源賊有功擢南京工科給事中歷官陝西

僉事

進賢縣志

劉源清字汝澄東平人正德九年進士任進賢知縣宸濠反源清積薪環室命家人曰事急火吾家一僕逸手刃以徇縣中諸惡少與賊通者悉杖殺之宸濠妃弟婁

伯歸上饒募兵源清邀戮之賊檄至立斬其使會餘干知縣馬津龍津驛丞孫天祐亦起兵拒賊賊遂不敢東嚮事平擢監察御史嘉靖十年以兵部左侍郎總督宣

大軍務

明史詹榮傳

劉守緒字克承湖廣興國州人正德九年進士除奉新知縣嚴明正大不以辭色假人平租徭理獄訟政簡而民帖然宸濠之亂守緒起兵赴義以都御史王守仁檄出閒道夜襲宸濠伏兵於新舊墳廠破之遂復南昌論

功歷升太僕寺卿

豫章書

何永清字原清廣西潯州人

一云開封人

國學生正德間爲

奉新縣丞華林賊起永清營城隍治武備從事兵間者數年後以子冲霄從副使周憲攻賊於華林冲霄力戰

死之永清亦以勞瘁卒身後蕭然無以爲斂及喪還傾

城爲之哭送

南昌府志

顧佖字民表四川成都人正德九年進士任豐城知縣興學省刑築隄捍水積粟至數萬石水旱減價以糴秋成糴還民賴以濟甯王宸濠謀逆以重兵阻江佖極力備禦捕斬從逆者四十八人以徇飛騎告變於王守仁守仁急返舟會諸郡合兵進討遂平宸濠敘功遷大理

寺丞

四川通志

吳大本字性夫南直隸宣城人正德十六年進士知進賢縣事儀賓李貴者怙勢橫暴以私逋殺人大本論治之賢聲遂起擢河南道御史

江蘇通志

陳世輔字汝鄰南直隸定遠籍鳳陽中衛人嘉靖二年

進士除南昌知縣每聽訟必曲爲開導卽引伏亦不苛求令其自化嘗有兄弟爭田者世輔且諭且泣兄弟二人竟以田相讓庭無滯案治爲先後知南昌者最南昌府志潘穎字叔愚浙江甯海人嘉靖二年進士任豐城知縣性通敏剛決甫莅任案牘積如山然一日盡與剖決堂下無稱冤者修葺學宮疏濬河道剔奸釐弊頌聲恆載

道馬新志

周崑字孟登浙江崇德人嘉靖二年進士授玉山知縣調進賢邑有盜魁蹤迹詭秘崑僞出游抵鄉捕得數其罪卽杖殺之人服其神明擢刑科都給事中南昌府志

商大節字孟堅湖廣鍾祥人嘉靖二年進士授豐城知縣縣故無城累遭寇掠大節始城之捕境內巨寇幾盡

擢兵科給事中累官保定巡撫

明史一統志

東漢字希節陝西華州人舉人嘉靖六年任南昌知府鎮守黎監怙勢張威誅索無忌獨不能干知府會錦衣使者至意有所干黎黨聞之曰姑且止東太守剛直不可犯也歲大饑出粟振之他郡悉來就食不爲禁曰均吾民奈何分彼此邪活者數萬遷長蘆鹽運使致仕

陝西

通志

謝存儒字懋修湖廣蒲圻人嘉靖五年進士由禮部郎中出知南昌府精吏事以廉敏爲僚屬先鞠獄務得情久之悉其謠俗方言雖獎獨童孺得自陳所患苦郡大治升雲南按察副使歷兵部右侍郎

豫章書

譙孟龍字乾甫四川南充人嘉靖十四年進士知南昌

府城西南茅園楓樹當章貢盱汝諸水之衝洪潦暴至
汪洋一壑孟龍糾眾築隄躬自勸役障民居五千餘家
田數萬畝至今名曰譙隄加意校士以故癸卯歲一郡
得人最多升雲南按察副使

豫章書

王天性字則衷廣東揭陽人嘉靖鄉舉任南昌府通判
質直疏豁有幹才署豐城縣事值平豐隄決天性相度
水勢知隄之潰以濱江故乃移馬湖內地僉工分築躬
寢食於隄上民期會訟獄者皆往赴焉隄成至今賴之

舊志 豐城縣志

邵榘字良用浙江仁和人嘉靖十七年進士任南昌知
縣勤敏莅政令兩吏讀民辭且聽且剖略無違失時邑
官熊浹有掌院之命榘往拜分庭抗禮不少遜浹益以

此高之及離任民涕泣追送江干不忍別

南昌府志

韓弼字汝良浙江平湖籍餘姚人嘉靖二十六年進士知豐城縣有異政擢知南昌府值景藩就國弼以羨餘供應民得不擾袁州散卒千餘人懷異圖詭稱入伍弼力排羣議卻之聞廣流賊將偪境亟議築城躬自相度至誠感民甫三月而事集又襲禽萍鄉賊於近境境以

無虞遷江西提學副使

嚴章書

嘉興府志

譚案調

齊人遺金一事頗類世俗小說所傳迹涉神奇不可爲

誤今不復錄入詞自有不朽者在初不繫此一端也

周美字濟叔南直隸崑山人嘉靖二十三年進士任進賢知縣縣賦多逋美遇春作時一切緩征民感其惠轉不遭賦乃出贖緩振饑建社倉備歉又捐已俸以修學宮百廢具興上計時至不能戒行李累遷刑部主事四

川按察副使

舊志

王修易浙江江山人嘉靖閒由歲貢任新建訓導日與諸生講學遇貧者輒周卹之故與巡撫張元沖爲同門友一日遣人召修易修易曰爲公事乎爲講學乎如講學也當以束來如公事卽明日趨府張聽之如禮延請乃赴

豫章書

殷士望字德甫南直隸丹徒人嘉靖閒倭寇縛其父大經將刃之士望詣賊請以身代賊爲感動兩釋之督學奏聞遂以附生充貢任新建教諭拳拳講學捐俸修尙友堂買書儲學舍以惠來者操履尺寸不踰升衢州教

授

豫章書

劉守崙字景仁湖廣興國州人嘉靖舉人授儀隴知縣

移掘大竹以最遷南昌府同知南昌熊生者與大學上
嚴嵩有連挾勢侵其鄉人田羣愬有司皆相視莫敢問
守嵩召熊至責狀撻之悉還所侵竟納綬以去

湖廣通志

劉應峯字紹衡湖廣茶陵人嘉靖三十五年進士除南
昌知縣縣當省會事難綜核應峯一以鎮靜處之不勞
而理均丁糧以僉差役省工食以覈機兵開十限以定
追徵均鋪行以蘇偏累革民船以省差擾政績爲一時
之最升吏部主事

萬曆南昌府志

程光甸字子極南直隸太湖人嘉靖三十八年進士任
進賢知縣值歲饑光甸自其家運米千石以振又爲地
方奏請建城卒後士民祠祀之

江南通志

金應徵字懋德南直隸長洲人嘉靖四十四年進士知

奉新縣縣依山無城應徵捐貲築之其後土寇竊發賴以捍衛累遷贛南兵備道雲南參政

江南通志

湯聘尹字國衡南直隸長洲人隆慶二年進士任進賢知縣邑有徵糧之役曰糧差者奉符徵糧先析二糧輸於官差則隨事分派民富者破產貧者廢業聘尹至奉行一條鞭法民所應出者總輸於官官任其事而民不擾百姓戴之

南昌府志

沈楠字汝林浙江仁和人隆慶二年進士授南昌府推官花園鄉故稱盜藪楠單騎往諭賊皆面縛悔罪乃白上官盡解縱之事聞賜金綺以卓異召爲監察御史

據浙

江南通志補

陳大章字祖堯一字夔石浙江鄞縣人嘉靖四十一年

進士隆慶五年任瑞州府通判抑漕卒之橫肆者漕使左右不敢索民一錢民德而祠之晉南昌府同知郡故濱湖多盜大章令健兒伏賈船中往來誘之盜至伏起輒殲滅豐城主簿某故廉吏爲奸民所訐忿欲自裁大章救之且白其誣尋爲忌者所中謫河東鹽運副使鄞

縣志補

顧九思字與容南直隸長洲人隆慶五年進士萬厯元年任豐城知縣邑有劇盜盤踞山谷閒久爲民害前令莫敢治九思請於上官假兵往捕入賊巢縛其魁眾皆羅拜諭以禍福禮義悉釋之使爲良善民賴以安後舉天下廉能第一

據南昌府志補

石漢汝陽人舉人授慶陽府推官萬厯閒擢知甯州才

識通達殲盜魁李大鑒議辦銅鼓營守備地方賴之擢

南昌兵備僉事

陳章

陸溥字文博浙江平湖人諸生以貲授上海縣丞調豐

城嘗督運夜過采石舟漏溥跪禱曰舟中有一錢非法

者請身葬魚腹比曉視之則三魚纏藻塞罅使密時人

異之爲文以紀其事

浙江通志謹案舊志作陸文博蓋誤以其字爲名今據嘉興府志

改正

張棟字伯任南直隸崑山人萬厯五年進士任新建知

縣清丈議起棟周行相視寒暑無所避所定科則邑永

利賴之擢工科給事中

江南通志

王亮字茂宏浙江臨海人萬厯五年進士任進賢知縣

性強項有爲嘗劾清丈田畝事凌難易於爲奸亮約

束簡便令民自占實期以一日攜飯糗偕里正履畝丈之小民不擾於供億而豪猾無所逞其奸其廉敏如此

南昌府志

范涑字原易南直隸休甯人萬厯二年進士任南昌知府歲大侵人啖草木根節原垌一空涑請於監司發儲胥躬視民窮瘠散給郊內外增竈設粥民得以哺病有藥死有瘞遠方不能轉餉者必躬親振卹同民緩急饑飽郡三歲大饑涑所存活數十萬家舉義倉弛河禁修圩隄濬城池通津梁興種植省徭役減驛遞在官五年以民爲命民亦倚涑爲身以忤兩臺左遷去父老謳思流涕乃建祠祀焉

萬國欽遺愛祠記 謝志原案涑先爲南昌令有治行前志俱入建昌名

官然守南昌政績尤著今改入南昌

林道楠字廷佐福建莆田人萬曆十一年進士除進賢知縣強直端謹歲饑乘小舸徧厯窮邨計口給粟春則假犢散種以惠平民繕學宮復社學築官隄皆出自道楠區畫丈量之役躬自履畝分則定賦雖貴勢不少徇人尤德之累擢太僕少卿

豫章書

支大綸字心易浙江嘉善人萬曆二年進士十三年以布政司副理問攝奉新縣事烏山巡檢捕盜不及格將妄入人大綸禁不許盜魁熊某黠猾難治大綸僞曰熊富有子讀書必不爲盜熊信之攜二子上謁盡出諸控牘示之語塞錮諸獄其黨皆鳥獸散邑上下鄉有南北二區履畝法行失其故爲以三折一之法而兩鄉安尋以拾遺落職歸

據南昌府志補

湯兆京字伯閎一字質齋南直隸宜興人萬厯二十年進士任豐城知縣居官廉敏甫三月弊蠹肅清以興起學校自任爲多士所推邑故多盜兆京摘發如神盜爲

哀息

南昌府志
豐城縣志

毛一瓚字獻卿浙江遂安人萬厯二十年進士任進賢知縣性清嚴善燴積弊胥吏不寒而慄居恆緼袍麤飯以自給曰非不近人情也奈土瘠何鄉人某持節過縣疑其矯廉排闥入內見家人坐簷下結巾廚唯蔬豆篋唯葛布一端而已嘆服而去擢吏部主事

進賢縣志

朱大啟字君興浙江秀水人萬厯三十八年進士授南昌推官郡方缺守卽委署府事縣役周正飢法橫於鄉大啟重按之周益儲通益妻殺益夜遁遺犬於室大啟

出犬銜隸衣驅不去命隨犬往於室中掘地得尸捕罪人至楚境獲焉徽商殺人法當抵商有奧援巡撫發縣審釋大啟覆讞時卽置之法臨江有大姓獄數年不決片言定之永甯爲吉安支縣前司理皆不臨其地大啟至釐其積弊清倉穀千石入爲戶部主事崇禎閒復以太僕寺卿督餉江右時有旨額外搜括大啟疏言江右貧瘠正額且不支安問額外遂得罷人尤感之歷官刑

部左侍郎卒贈尙書

舊志
興府志
嘉

馬鳴起字思劬福建龍溪人萬厯三十八年進士授新建知縣歲甲寅大侵鳴起設法振恤活饑民無算咸曰再生者我馬侯也未幾以御史召終戶部尙書

漳州府志

張昌辰字漢明浙江臨海人爲諸生二十年以善治春

秋名登萬曆三十一年鄉薦越十年癸丑始成進士除
豐城知縣縣故多宦族每挾勢以虐民昌辰下車廉得
尙書某侵民舍旁隙地僉憲某斂債人民子女狀卽詣
撫按白之下昌辰勘問論如律皆俛首無辭一時豪右
多斂迹

浙江通志

徐揚先字南高應天江甯人萬曆四十一年進士授萬
安知縣調豐城訟獄大小立剖尤加意馬湖熊坊諸隄
至今利賴豐城賦重役繁胥吏寢窟爲弊揚先稔知之
搜剔一清民無逋負之累奏最擢御史累官太僕卿

豐城志

李嗣京字少文南直隸興化人崇禎元年進士任南昌
府推官治獄廉平改折奉新縣南糧及革派馬之弊民

甚德之擢御史

據南昌府志補

江正統元年二月二十一日南昌府

謝龍文字橋東廣東瓊山人崇禎元年進士任豐城知縣時流寇震動龍文募兵措餉寇不敢犯歲丙子大饑首捐俸以倡振濟民多全活先是漕南米立三倉歲久傾圯龍文合建於小東門外曰永便倉宏敞堅固國儲賴焉又建大港口石橋以便行旅置義塚以掩枯骼皆實力爲之在任九年清操如一日

南昌府志

胡時亨字慎三南直隸無錫人崇禎十年進士爲南昌府推官十六年袁寇聚天井窩時亨親勦平之餘黨率

眾降

安志

謹案謝志有胡時中傳稱其己卯壬午兩

春上寇李肅七等竊發時中行監軍事與統帥定計用

開戮其渠散其黨以撫爲勦不越月而平發振安民清

還子女收瘞枯骨三縣各立生祠云云三縣字上無所

承不知何指時中科貫官階並與時亨同惟字伯昭則

略異或卽一人而重
出者歟附注俟考

郝錦字綱卿南直隸英山人崇禎十年進士知豐城縣
清里甲覈包攬翕然稱善治尋調新建其治之也猶豐
城內擢御史謝病歸結廬九江山

江南通志

史夏隆南直隸宜興人崇禎十六年進士授南昌府推
官從布政使夏萬亨副使王養正等起兵守建昌城破
械至南昌不屈死

據明史補

寇可教湖廣應城人舉人崇禎間任武甯知縣時征輸
暴急可教刻木爲隸以杜擾輸將者益勸豪猾害鄉里
者翦其魁諸奸斂迹邑界吳楚之交寇盜時入可教請
於武甯城置守備以鄧子龍之孫名禪者統之草竊無
敢窺伺十七年罵賊死難

據南昌府志補

袁斌字佐廷浙江鄞縣人善射及槊崇禎十六年以叅將勦奉新土賊李肅七等

明季北略作李東陽等踞靖安奉新安義三縣

奮戰

矢盡沒於陳然賊鋒由此亦挫人咸稱其捍禦之功不

獨以勇烈著云

國朝賜諡節愍

勝朝殉節諸臣錄安志

謹案舊志有劉綱胡時中二傳綱官雲南之甯州義甯州志已辨其誤時中不見進士題名碑蓋卽時亨之謄今並從刪汰

國朝

楊泰字春和山西偏關人拔貢生順治三年授靖安知縣金聲桓之變泰以守土臣分當死慷慨自誓及城陷自殺以殉聞者壯之

統志山西通志

張慎行字恒庵直隸南宮人恩貢生順治八年知靖安

縣事時安義黠寇猝至慎行募兵集鄉勇出奇計追逐

殲殄殆盡升興屯同知

靖安縣志

徐鳳鳴字祥宇遼東人任進賢知縣壬辰冬土寇侵境鳳鳴率眾力戰矢集其面氣益奮手殺數十人賊懼引

去邑賴以安

一統志進賢縣志

王斗樞字均五山東諸城人順治十二年進士補進賢知縣新學禮士繕城治兵墾荒田若干頃時閭亂土賊閒起南康盜李標等溯湖上焚掠連晝夜斗樞奉檄進

勦擒其渠魁督撫交章薦之一

一統志進賢縣志

屠尙字潤綸江南無錫人順治十二年進士十六年知靖安縣盧洪十倡亂華坊坪尙與叅將張允重率兵協攻踰月平之會兩粵用兵奉檄造舟尙設法措置而民

不知在官三載無封殖之私黜浮費汰冗役絕竿牘寓撫字於催科尤加意學校課試諸生人文蔚起致政歸

士民有誰嗣之歌焉

一統志靖安縣志

黎士毅字道行福建長汀人拔貢生順治中知南昌縣事邑舊稅溢額士毅力請上官奏除之山賊彭某以僞劄聚眾攻剽四出督兵捕斬其魁尋遷知壽州

一統志福建

通志

魏雙鳳字雝伯直隸獲鹿人順治十五年進士十七年知新建縣事大兵自楚入廣軍需旁午雙鳳理之裕如以暇創立縣治學宮修驛築塘百廢具舉課士西昌書院分校癸卯秋闈得士俱盛績最擢御史

一統志新建縣志

黃虞再字泰升陝西伏羌人順治十二年進士十七年

知奉新縣事時冊籍散軼賦逋纍纍吏胥因緣爲奸虞再莅任知其弊詳請清丈民田履畝勘對積弊爲之一清均圖里立團練諸政具舉其初民頗難之久乃食其德虞再執法嚴豪猾聞風斂迹尤善形家言創建官署文廟及他亭館咸有關形勢俸滿內擢後官江西督學僉事祀名宦

補昌南志

李成芳字篤生四川巴縣人貢生康熙四年任甯州州同十四年夏土賊張納龍等入寇次上坑嶺成芳帥師拒戰死之七日顏色如生知州任暄猷上其事廕一子

雍正三年入祀忠賢祠

義甯州志

何嘉祐字子受浙江山陰人副貢生康熙四年知奉新縣事縣民多逋賦嘉祐區畫有方不事鞭扑浹歲閒宿

逋爲清民健訟申誠嚴禁刁風以息厯官監察御史

浙江

通志

朱萬壽本姓祝字補之江南廬江人以茂異從征伐有功授德化令後改武職康熙六年防守甯州十三年冬戌卒李忠謀逆率眾侵城萬壽一夕追賊至半山斬忠等明年以解圍功升銅鼓營守備十五年秋土賊四路入寇萬壽分守北門浹旬日夜捍禦卒賴以全

南昌志

任賸猷字美君漢軍正白旗人

原作河南息縣人

順治十二年

進士康熙十二年知甯州事十三年冬戌卒謀亂連山賊入攻賸猷練鄉兵數千率以勦賊三戰皆破之城賴以全敘功擢知府

一統志義甯州志

董宏毅字士超一字任庵漢軍正紅旗人康熙十二年

以監督出知奉新縣時耿精忠倡亂閩中新昌甯州卒盜蜂起十月賊大至宏毅率官兵協力死守城獲全當是時賊所過諸城多摧破惟奉新殺賊最多宏毅力也既從分巡道李世昌大破賊於寒婆嶺撫流亡萬餘人兵荒後民苦輸餉宏毅力請題蠲困賴以蘇越三年以循良擢陝西莊浪同知去之日士民號泣聲震數十里

南昌府志
奉新縣志

高爵本姓陸字漢封江南崑山人順治十八年武進士康熙十二年任銅鼓營守備營兵最驕悍難制閩治其尤暴者民始安性仁恕多才略清靜儉約親賢樂善事有病民者悉詳請禁止蒐甲兵勤訓練憂危勞苦撫綏並至暇則彈琴賦詩役志文史著有楚寶堂集

南昌府志

胡鼎生字還竹湖廣景陵人

原作竟陵人誤

順治十六年進士

康熙十三年授進賢令會亢旱數月苗盡槁鼎生仰天

呼曰吾民何罪罪當及余朝夕步禱於城隍神不雨更

跣足行烈日中三日膚盡脫卒不雨遂大哭命吏取重

械自肩朱署曰失職合某祝如前是日澍雨境內霑洽

歲乃登縣濱鄱陽湖盜賊出沒鼎生偕鎮將防守嘗以

少擊眾賊自是不復窺縣

南昌府志進賢縣志

牛鳳翔漢軍正白旗人任江西左協遊擊慷慨好施與

士卒同甘苦康熙十四年春瑞州新昌上高諸縣草寇

竊據鳳翔提軍恢復之其年閏五月往援甯州道武甯

值賊圍縣鳳翔率精騎左右衝擊賊奔潰乘勝薄甯州

遂復州城釋脅從恤殘黎地方安輯十一月賊復圍甯

州鳳翔守西門率前鋒出禦戰於馬洲射中賊渠賊不

敢近相拒十晝夜城賴以全

八旗通志

林鐘字仲呂一字龍津福建南平人拔貢生康熙十四

年由豐城縣丞升知靖安縣邑先爲盜所殘城空民散

鐘至多方招集力爲守禦聞入賊營諭以順逆大義賊

不敢犯又以丁缺田荒請蠲租以恤民困重葺文廟課

諸生百廢具舉以病乞歸士民祖道泣送者不絕

靖安縣志

楊周憲字覺山順天大興人康熙三年進士十九年任

新建知縣省垣舊多火患周憲教民置火巷設器具得

免延燎縣東北吳城鎮卑溼慮澇捐築石隄禦之民號

曰楊公隄遞卒役勞而食溥購田以贍舊邑志其手輯

也從祀名宦

南昌府志

詳案楊周憲進士題名碑作周憲文蓋榜姓也

王簡之順天通州人康熙二十七年進士任武甯知縣
小心抑畏平易近人閭里無追呼之擾而簿書期會未
嘗後時公庭閭然無人有古人臥治遺意以老乞休士

民建生祠於曹婆洞側

武甯縣志

鮑滋字竹洲浙江鄞縣人舉人康熙閒任武甯知縣甫
下車卽捐貲修城踰年白頭賊由靖安入寇滋偕守備
馬文燦率鄉兵與戰瓜源南鄉凡再敗之平坑賊西奔
陷甯州乘勝東下圍縣城滋及文燦誓死堅守相持五
晝夜援至圍解已而賊復圍城設伏夾擊大破之武甯
前後被寇數年加以饑饉滋簡閱兵民籌畫糧餉一以
信義相激故人人願效死力所向有功尋以軍功內遷
民建生祠於登仕橋側卒祀名宦

武甯縣志

馬文燦江南江甯人幼習韜鈴有膽略戰能以少勝眾康熙中由武進士任武甯營守備與知縣鮑汝善汝亦倚重文燦白頭兵入寇文燦出奇設伏東擊西殲歷三四年不懈屢戰屢克勞加於汝故他邑皆被禍獨武甯無虞文燦力也後汝以軍功內遷而文燦格吏議不獲與鬱鬱以死士民悲之文燦弟文煒鄉人所稱馬七者亦英武善戰平坑之役斬獲尤多兄弟皆於武甯有功

云

南昌府志

葉如桂康熙二十一年任南昌知縣以清廉名先是南昌民納糧必躬詣水次交兌運軍因緣爲奸索賄不足輒以米惡告民負米至露積之如桂乃與紳耆議就進賢門外置倉民兌於官官兌於艘弊乃革南昌民至今

食其德焉

南昌府志

盧炳字子陽雲南石屏州人康熙二十七年進士三十

三年任南昌知縣素清正上官敬禮之廉潔自愛不名一錢後令有貪黠者至民輒思曰安得清廉如盧公時

也

南昌府志

尚崇震盛京人康熙三十八年任進賢知縣先是徵收之法圖設里長一人主催收事注合圖總數於冊官不知民民不見官名曰捆徵由是積逋纍纍崇震令里長但催勿收二月開徵十月畢分三卯卯各輸三之一玩延者官自提究之每甲設滾單一以糧多寡爲第單至以次遞納不事鞭扑而民無逋賦鄰邑偕仿效之

南昌府志

謹案崇震所立法本各省通例並江西當日行是法者自崇震始也

吳荃字蓀右江南丹陽人康熙三十九年進士知新建縣縣多積逋前令追呼之罔濟荃見吏上徵比冊嘆曰民皆赤子嗜赤子肌膚以保一官吾不忍爲也勸諭輸

將民不忍負爭完納卒免絀吏議

南昌府志
新建縣志

佟世俊漢軍正藍旗人

原作奉天

康熙四十三年以例監

任南昌知縣治事明決尤能以德感民值歲侵饑民數萬人排巡撫轅門求賑譟達廳事巡撫佟國勦諭之不能解世俊故國勦從子聞信急馳至民擁馬首言狀世俊曰巡撫視若輩如子豈令汝餓者旦將發粟食爾勿譁也眾頓首謝遂散去世俊入力請開倉從之民賴以生後世俊去男婦泣而送者數千人

南昌府志

邵錫光字克大浙江仁和人吳遠子康熙四十五年進

士五十四年任新建知縣下車卽革陋規減耗羨善決疑獄上官輒屬以他邑事清江縣婦人何氏夫死族人誣何毒其夫獄已具錫光奉檄覆檢傷在臂曰此陰症也冤遂白貴溪楊胥衷爲無賴子所私賄捕誣以盜錫光發其奸遂服丁內艱歸服闋累官至雲南知州

浙江通志

李蓮字石湖湖北鍾祥人舉人康熙五十七年任南昌知縣剛正不阿劉姓婦以死殉夫母家疑而訟之蓮驗得其實叱訟者去自爲詩以彰婦節兩姓之怨遂釋歸川吳某擁厚貲盜葬故明太保萬恭祖孫塋地萬訟之官三年不能勝蓮白巡撫檄府縣會勘獲前明諭葬碑碣於山中坐吳以罪而以山歸萬氏觀者譙然呼青天又嘗創以丁墮糧之法上官初不允其後卒如蓮議至

今便焉

南昌府志

劉輝祖字念夫康熙五十八年知新建縣縣附郭繁劇難治民間田土爭訟有五六十年案尙積者輝祖至檢閱舊牘剖斷一清縣學宮頽廢數十年捐俸修葺設立義圖民輸將稱便尋被劾歸再起歷泰安知府

南昌府志

繆象衡字北鑰江蘇如皋人雍正五年任甯州州判才識明敏兩署州篆有暴客殺人而攫其貲者單騎往勘中途偵得盜藪親獲數盜一詰而服人皆異之

南昌府志

劉德成奉天錦縣人雍正二年進士十年任南昌知縣有能名民有負糧者吏逮之急鬻妻得十六金潛納夾袋中吏未知也中途飯於市肆以金寄主人所飯已訖縣出袋則金已亡索之肆不得吏亦證民無金德成察

民狀甚誠趣縛肆主人伏庭下遣他吏往肆中紿其婦得所匿金乃咎肆主人而民賦以償

南昌府志

趙知希字太音安徽涇縣人雍正十年任奉新知縣邑有假神言禍福者愚民趨之若鶩知希命舁神至縣焚之遂絕黠民充斥布政司役坐事當杖自云憲胥也須申請乃可知希笑曰杖然後請何如卒杖之其持正多類

此

南昌府志

高尚禮山西太原人舉人雍正十二年署南昌縣事縣訟故繁胥吏執官帖繫人輒橫索無厭至有破產不得結者尚禮至創爲紙差之法給訟者官符一紙紙尾繪蒯卒狀使付證家轉畀被訟者計地遠近令被訟之人執符自投有違者始命蒯卒往捕至則痛懲之非命盜

大獄不遭捕役皆以紙差行之由是人樂其簡易隨紙差來者毋敢後法行奸胥以爲大戚尤加意保甲暇則行鄉里偵察游惰奸宄無所容時方嚴賭博禁吏欲得金輒誣平人尙禮怒曰禁博所以弭盜爲若輩營壘斷邪立箠之吏乃懼博者聞風亦慚謝相戒尋調署豐城

令南昌府志

謹案豐城縣志載尙禮署豐城令時徵收嚴革火耗拆封日庫吏進短封戶名請勾取尙禮

笑曰此中豈無美餘足均補者奈何以分釐故擾吾民邪不許獄經數年未結者旬月判決殆盡人頌神明先是縣胥多在法婪賄尙禮痛懲之有某姓隸尤橫暴尙禮因事斃之杖下合邑稱快去官日邑有清官離任赤子失哺之泣祖

送者以干計

朱允元字耐亭直隸東明人康熙五十四年進士雍正十二年任新建知縣性慈和廉靜絲毫無所苟取或議其迂緩慨然曰吾豈不能操三尺法以片刻了事但口

舌集詬非嫺族卽朋鄰耳一旦盡發其私久必蓄憾後
訟旋生姑緩之使自悔悟而消釋所益不較多乎人以
爲名言

新建縣志

許淵字仲涵浙江山陰人乾隆五年知甯州才識練達
積牘累年皆一時剖決政暇建濂山書院以雲岩洞山
兩寺租爲諸生膏火夏水暴漲城不沒者三版淵徒步
禱於神水驟退莅官十餘年百姓安堵升蓮花廳同知

南昌府志
義甯州志

黃登穀字春畬順天大興人乾隆二年進士八年任新
建知縣廉明剛介雖強宗豪右不少瞻徇治獄平允民
德之登穀本貴公子而謙抑禮士甄拔皆寒畯時尤以
此爲賢

南昌府志

邱蘭標字香祖江蘇溧陽人舉人乾隆十一年由瑞金知縣調知新建政簡刑清愛民如子嘗延邑士重修縣志搜訪無遺洞知民間疾苦所爲公牘及他文章慈祥愷惻之心溢於楮墨人皆傳誦弗衰

南昌府志

向德一字輔世湖南溆浦人舉人乾隆十一年任進賢知縣下車清理積案日數十事皆褫服而去修羅溪橋隄創建曲水書院置田畝以給膏火士民德之乞養歸縣民陳某殺何氏子沈其尸何母訟冤久不決後令坐累去及德一服闋起原官悉得其狀陳乃服辜

南昌志

馮士俊浙江人乾隆十三年以儒士除柿源司巡檢十五年署三江司事司地界南昌進賢豐城三縣牙充最多士俊清保甲察旅宿夜輒藏火袖中弓兵暗尾之凡

穿窬所伏至卽擒之出無再犯者璜溪去市三十里諸亡命誘富兒博士俊單騎往收之博亦息盜魁鄒貴者奸剽也橫甚憚士俊不敢渡河逋囚曰硬米果者上官捕且急計擒得之俗好格鬪屠牛士俊偵獲雜治民習爲之一變嘗執一虐姑婦人縛諸楹榜曰忤逆者視此

一時傳以爲快云

南昌府志

朱若炳字桐莊廣西臨桂人乾隆二年進士十八年知南昌府勤於吏治夜閱牘至漏下三鼓必盡過目而後已無少留滯歲科試童生爲卷萬餘皆親第甲乙不假僚屬以勞瘁卒於官

南昌府志

胡永錫順天大興人諸生乾隆十九年任進賢典史居官循循儒者口不言利利亦弗之及四壁蕭然晏如也

或問之笑而答曰生平不解營謀爲官豈能驟學矧官以禁邪奈何以官邪乎兩署尉事俱以註誤去士民惜之

南昌府志

彭鏌字鳴玉湖北漢陽人乾隆二十四年任進賢縣丞非公事不謁長吏日用常困乏其父家居每出私蓄助之勉爲廉吏厯署本縣及他邑事俱有聲

南昌府志

邊學海字進之一字珠淵直隸任邱人由舉人大挑知縣發江西厯官宜黃德安新建清江諸縣臨江府通判甯都直隸州知州饒州吉安同知皆有惠政乾隆三十七年權甯州事州在萬山之中與湖南北接壤棚民棲止其間多爲盜所苦學海嚴緝盜首吳落滿等五人置之法餘盜皆遁出境鄉邑以安濂山書院久圯率紳士

醵貲修建規模煥然在任期年士民懷德累擢南昌九

江知府吉南贛甯兵備道坐累罷官

義甯州志
行狀

謝遵義浙江會稽人監生乾隆四十四年由星子知縣
調署新建富民某以移尸事受誣械繫累月遵義微服
至鄉廉得其實冤始雪有貧者自經富家門墮下往驗
無傷及鞠貧者家固謂死堂內非檐指富家堂上懸繩
爲證遵義卽升案引繩繩立斷塵簸簸落乃斥訴者而
富家得無事人呼爲謝青天

南昌府志

張敦仁字仲篴一字古餘山西陽城人乾隆四十年進
士任高安知縣公正廉明精於吏事治盜嚴宵小爲之
斂迹在官四年無笙歌燕飲之事調知廬陵升銅鼓營
同知歷攝九江撫州南安饒州府事嘉慶五年改官江

蘇數年後復補江西吉安知府再署南昌府事所屬武甯縣有婦與二人私而殺其夫前守以夫死中途非由婦姦報敦仁復鞠之詞無異死者之子年十三矣獨哭而不言敦仁疑之請留前守會鞠遂得婦與二人謀殺移尸他所狀案乃定龍泉縣天地會匪滋事巡撫檄往勘未至鎮道已集兵擒二百餘人民大懼敦仁察知匪眾與溫姓者有隙相仇殺與叛逆殊堅持輕比坐爲首者二人餘盡得釋十八年回吉安府任沿江多盜擇能捕吏巡緝論強宗擒首毋匿逋逃河道以靖二十一年調補南昌知府蓮花廳民尹氏妾與僕通主母死疑妾與僕謀殺鹽商鄒姓與賈販爭利而鬬羣不逞因毀鄒氏室時議右鄒將坐羣賈以聚眾罪敦仁皆平反申理

之二十五年護督糧道篆道光元年擢雲南鹽法道以

病致仕

瑞州府志
高縣志

行狀

王寰江蘇金匱人

原作無
錫人

乾隆五十五年進士嘉慶三

年任武甯知縣甯州教匪滋事巡撫張誠基調兵由武甯西上羽檄飛馳人皆悚懼寰以一身支拄其閒兵有違法者卽臨以杖曰若告汝長吾不重一令以害吾民也已而事平巡撫復率兵道武甯以歸合邑農商皆案堵如故卒於官至今言及者猶歛噓思慕不置云

南昌府志

劉光字劒津雲南建水人舉人嘉慶三年由建昌知縣

調署甯州事莅任八日土賊劉聯登等合蒲圻匪黨焚

劫鄉里邑民聞之皆驚徙光出署親巡市井勸諸父老

曰汝等勿逃居城中猶可堅守禦敵吾亦力爲汝保障

若竄城外遇賊來必無噍類矣於是民心始安

南昌府志

黎世序字湛溪初名承惠河南羅山人嘉慶元年進士授星子知縣調南豐再調南昌南昌爲圻省首邑事繁劇世序每晨起視事退食後接賓客理案牘恆五夜不倦老吏驚以爲神西鄉地苦水潦新穀不登者數載世序捐俸築隄民得無患壬戌癸亥洊饑勸分施振之事皆身親之在官五年以次興利除弊驅玩法之徒懲作奸之吏庭無滯訟獄無淹囚治狀爲一時最然邦人尤以創復東湖書院沾溉士類傳爲美談云累官至南河

總督卒諡襄勤

本傳 南昌府志 南

田懋仁字克齋貴州玉屏人舉人嘉慶五年由浮梁知縣調署甯州事勤於政治日坐堂皇判事自辰至未無

倦容有老嫗子出外不反嫗疑其婦與鄰乙爲奸因以致斃控之官繫獄三載懋仁至訪得嫗子立釋鄰與婦歸善捕盜賊有以失物告者朝報夕獲嚴治之不少貸數月閒盜患竟絕

南昌府志

陸模孫字軼範一字遠亭江蘇鎮洋人乾隆五十二年進士嘉慶八年任義甯州事甫下車卽謁黃文節公祠招諸生集濂溪書院親爲講說剖析經史疑義娓娓數千言諸生傾聽如坐春風中焉爲政寬猛兼濟案積年不決者皆鏡燭犀剖立成信讞民大畏服九年丁母憂倚居於州州人知其清苦爭奉薪米以供服闋入都紳民送者千餘人十五年復任至官數日而卒或傳以爲城隍神云

南昌府志

王泉之字漢槎湖南清泉人嘉慶中任進賢知縣勸求民瘼興利除害鄰境擔匪肅爛腳結黨橫行有紅線黑線之號捕役莫能詰泉之請委弁會營搜捕懲治百餘人閭閻始謐羅溪至玉嶺將二十里環繞皆山宵小易伏匿乃移塘汛駐馬坵鋪司稽察自是四境安堵餘干朱毛俚煽結奸民爲逆泉之誦得之密白院司星馳掩捕獲僞軍師胡秉耀等餘眾悉解散

詔以直隸州知州升用邑鹽萬四千引銷不及額頗累民泉之力請減引額八千歸南昌新建融銷官民之困遂解

府志 雷鼎

金主弟子記

胡世塘字杏溪安徽涇縣人嘉慶十六年進士

原作乾隆誤

十九年署靖安縣事聽訟明決積牘一清劉某者茶坪

鄉富人也夜半有尸在牛欄中里長以報世塘驗知爲強丐挾嫌嫁禍以死者輕生論結劉得免破家先是邑中訐告風甚熾至是知不得行則有挾虛詞至半途返者凡含沙射影之技至案立破四境肅然尋補吉水縣民惜其去追送者相望於道

南昌府志

周澍字雨亭浙江錢塘人拔貢生嘉慶二十二年任義甯州事刻勵振作燭奸如神聽訟必坐堂皇來觀者弗禁獄將成輒問眾曰公否眾頷之乃決爲政以化民成俗爲先撰四言詩以諭民刊布遠邇實心實政至今婦孺猶稱道不衰

南昌府志

霍樹清字松軒陝西朝邑人嘉慶七年進士由庶吉士改知縣道光三年攝鄱陽有聲五年知新建縣比歲豐

稔樹清依額徵漕杜一切濫取之弊遇民訟小故和顏
勸諭至再至三往往感悔泣下其不可罷者則剖是非
權輕重立決遣之後升南昌府同知

南昌府志

石家紹字瑤辰一字民儲山西翼城人道光二年進士
籤發江西補龍南知縣調上饒歷署大庾新城諸縣皆有
惠政其在龍南發奸摘伏民尤以爲神十一年調署
新建其年五月大水家紹撫恤災黎恩勤甚至至秋御
事冬十月饑民間省會散賑皆聚附郭之沙井上官聞
之令家紹偕新建令張渭往治賑事始散米令饑民自
爨已而來者蝟集瀕河地幾莫能容且慮生事於是改
散錢令得錢者各還其鄉俟截留漕糧以濟閭閻旬饑
民數萬漸散去調知南昌首邑事煩官此者多不暇給

家紹猶日以奔走酬酢之餘坐堂皇受民詞訟夜或出城數十里游巡伺察使奸宄無所容會甲午邑復大水家紹請於上官開倉平糶其力不任糶者復分廠煮粥以賑之主者循例備三千人食而就食者五萬人扶老攜幼攘臂喧爭洶洶不可止大吏亟檄家紹往諭至則謂之曰汝等速散詰朝看告示斷不使有一饑民無粥噉也又曰汝等尙有人爲之謀食我則已不食三日矣聲與淚俱眾皆感泣曰石爹爹不欺人我輩無多事遂散去爹爹者江西民呼父也方皇遽時大吏遣官開諭者數矣皆罔聞知及家紹至片言解其素行感人如此擢銅鼓營同知歷署贛州饒州知府十九年卒於官無子龍南新城上饒新建南昌諸縣皆請祀名宦南昌則

別立祠以祀焉

包世臣石公祠記 南昌府志

顧麟趾字恕齋陝西人由吏員投進賢知縣值水災撫恤備至全活者甚多孜孜以禮讓化民境內稱治尋調新建歷都昌廬陵諸縣並著賢聲終河口同知進賢縣志張寅字子畏安徽桐城人道光二年進士由九江知府調知南昌府十五六年閒江西數大水疾疫流行蝗災繼作寅捐錢穀施醫藥給構櫝置局買蝗教民掩捕治荒政甚具又念郡治濱江隄防宜豫乃行屬邑察形勢於豐城上游築隄下游建閘皆隄以石隆如屹如以迄南昌新建進賢諸縣舊圩塌損咸整齊之復創建義倉儲穀六萬八千餘石以爲荒備立洪都書院以育人才治行卓立稱一時最風骨峭厲勇於有爲當時頗以嚴

見憚及被議去官行李而外更無長物士民咸慨然有

去思焉

南昌府志

陳鳳廷字來儀四川資陽人舉人道光十四年任奉新
知縣居官廉潔禁胥役浮收之弊水災奉文積穀吏或
循行故事惟奉新捐白金至一萬七千餘兩視他邑稱
最尤勒於聽斷上控巨案數月卽審結詳銷之民以無

累

資陽縣鄉賢崇祀冊

朱良翰字松齋陝西咸甯人舉人道光十六年知武甯
縣事性廉樸治吏胥丁僕尤嚴未幾廝役皆逡巡告去
乃懸鉦宅門有事則叩之出爲簡理由是壅遏之弊悉
絕而民情得上通先是武甯徵漕歲糜倉用八百餘金
至是丁役大減僅支八十餘金而已明年邑大水鄉民

之悍者藉以滋事良翰嚴治其渠境內安定尋因事解

任邑人生祀之

南昌府志

吳憲文字煥其安徽婺源人道光三年進士十八年任奉新邑民輸稅遲速不齊吏緣以爲姦憲文造申票示以畫一尤善治盜獲巨魁李華山等悉置之法二十二年湖北寇警奉新與接壤修縣城募丁壯晝夜巡防邑以無事歲早開倉設賑詳請緩徵歸德鄉多棚民僻遠少文設西坪書院以教之嘗兼攝靖安兩邑相距僅四十里朝往暮歸閱月清積牘數二十八年調署義甯州仍回本任未幾以疾去官卒光緒五年巡撫李文敏

奏請入祀名宦祠

奉新縣志
儒冊

葉濟英字枚生直隸滄州人知義甯州事莅官數年政

簡刑清民樂其化咸豐三年粵賊徧江西濟英集士民
諭之曰義甯筦鑰陸路一失利全省皆危事至圖之抑
又何及矧

先朝寵錫嘉名正以州民多義殺賊宣威顯名報國在此時也
眾皆歡躍感奮於是籌捐設團八鄉響應皆悉眾爭先
以赴敵號埽地勇自四年三月至五年與賊相持大小
數十戰皆捷賊恨甚五年四月悉悍黨數萬來犯時餉
匱已久援不至鄉兵力戰久疲至是頻失利濟英猶督
長子圭萬登陴固守氣不少衰五月九日城陷濟英北
面再拜投署側愛蓮池死之圭萬亦力戰死家屬從死
者四十餘人事

閭贈光祿寺卿建專祠其後州人立祠池上肖像以祀人祠觀

者皆泣下

江西忠義錄
南昌府志

江西通志卷一百二十八